



眞繫

ル 5  
3254  
12



3254  
14

滇繫書目

趙州師 範荔屏纂輯

典故第六冊

諸葛武侯傳

韋臯傳

瞻思丁傳 附二子

沐英傳 附後嗣

傅友德傳

方政傳

滇繫七之六

典故目錄

范荔屏

楊繼宗傳

王恕傳

劉綬傳

鄧子龍傳

李恢傳

呂凱傳

李呂二公以滇人而治滇故附之諸葛武侯後

滇繫

典故繫

趙州師

範荔扉纂輯

剛節季漢書丞相武鄉侯諸葛亮傳

諸葛亮字孔明瑯琊陽都人躬耕隴畝好為梁父吟家南陽之鄧縣在今襄陽城西二十里號隆中身長八尺每自比於管仲樂毅時人莫之許也惟博陵崔州平潁川徐元直與亮友善謂為信然時昭烈屯新野元直往見昭烈器之曰庶何足道諸葛孔明者臥龍也將軍豈願見之乎昭烈曰君與俱來庶曰此人可就見不可屈致將軍宜枉駕顧之由是昭烈遂詣亮凡三往

乃見情好日密關張等不悅昭烈解之曰孤之有孔明猶魚之有水也願諸君勿復言羽飛乃止後合孫權破曹操於赤壁昭烈遂收江南以爲軍師中郎將使督零陵桂陽長沙三郡調其賦稅以充軍實施佐昭烈定益州延康元年曹丕篡漢次年昭烈猶稱建安二十六年羣下勸昭烈卽尊位嗣漢未許亮說之於是卽帝位于成都改漢建安二十六年爲漢章武元年策亮爲丞相亮刑法峻急法正諫曰昔高祖入關約法三章秦民知德今君假借威力跨據一州初有其國未垂惠撫且客主之義宜相降下願緩刑弛禁以慰其望亮答曰君知其一未知其二

秦以無道政苛民怨匹夫大呼天下土崩高祖因之可以宏濟劉璋闇弱自焉已來有累世之恩文法羈縻互相承奉德政不舉威刑不肅蜀土人士專權自恣君臣之道漸以陵替寵之以位位極則賤順之以恩恩竭則慢所以致弊實由于此吾今威之以法法行則知恩限之以爵爵加則知榮榮恩並濟上下有節爲治之要於斯而著章武三年春昭烈於永安病篤召亮屬以後事謂之曰君才十倍曹丕必能安國終定大事若嗣子可輔輔之如其不才君可自取亮涕泣曰臣敢竭股肱之力効忠貞之節繼之以死昭烈又爲詔勅後主曰汝與丞相從事事之

如父建興元年封武鄉侯開府治事頃之又領益州牧政無巨細咸決於亮南中諸郡叛亂以新遭大喪故未加兵且遣使聘吳因結和親爲與國

亮集曰是歲魏司徒華歆司空王朗尚書令陳羣太史令許芝謁者僕射諸葛璋各有書與亮陳天命人事欲使舉國稱藩亮遂不報書作正議曰昔在項羽起不由德雖處華夏秉帝者之勢卒就湯鑊爲後永戒魏不審鑒今次之矣免身爲幸戒在子孫而二三子各以耆艾之齒承僞指而進書有若崇竦稱莽之功亦將偪于元禍苟免者耶昔世祖之創迹舊

基奮羸卒數千摧莽彊旅四十餘萬於昆陽之郊夫據道討淫不在衆寡及至孟德以其譎勝之力舉數十萬之師救張郃于陽平勢窮慮悔僅能自脫辱其鋒銳之衆遂喪漢中之地深知神器不可妄獲旋還未至感毒而死子桓淫逸繼之以篡縱使二三子多逞蘇張詭靡之說奉進驩兜滔天之辭欲以誣毀唐帝諷解禹稷所謂徒喪文藻煩勞翰墨者矣夫大人君子之所不爲也又軍誠曰萬人必死橫行天下昔軒轅氏整卒數萬制四方定海內况以數十萬之衆據道而臨有罪可得干擬者哉

三年春亮率衆南征詔賜金鈇鉞一具曲蓋一前後羽葆鼓吹各一部虎賁六十人其秋悉平軍資所出國以富饒

習鑿齒漢晉春秋曰亮至南中所在戰捷聞孟獲者爲夷漢所服募生致之旣得使觀于營陣之間問曰此軍何如獲對曰向者不知虛實故敗今蒙賜觀看營陣若祇如此卽定易勝耳亮笑縱使更戰七縱七擒而亮猶遣獲獲止不去曰公天威也南人不復反矣遂至滇池南中平皆卽其渠率而用之或以諫亮亮曰若留外人則當留兵兵留則無所食一不易也如夷新傷破父兄死喪留外人而無兵者必成禍患二

不易也又夷累有廢殺之罪自嫌費重若留外人終不相信三不易也今吾欲使不留兵不運糧而綱紀粗定夷漢粗安故耳

乃治戎講武以俟大舉伐魏五年率諸軍北駐漢中臨發上疏曰先帝創業未半而中道崩殂今天下三分益州疲弊此誠危急存亡之秋也然侍衛之臣不懈於內忠志之士忘身于外者蓋追先帝之殊遇欲報之于陛下也誠宜開張聖聽以光先帝遺德恢宏志士之氣不宜妄自菲薄引喻失義以塞忠諫之路也宮中府中俱爲一體陟罰臧否不宜異同若有作奸犯科及

爲忠善者宜付有司論其刑賞以昭陛下平明之理不宜偏私使內外異法也侍中侍郎郭攸之費禕董允等此皆良實志慮忠純是以先帝簡拔以遺陛下愚以爲宮中之事事無大小悉以咨之然後施行必能裨補闕漏有所廣益將軍向寵性行淑均曉暢軍事試用于昔日先帝稱之曰能是以衆議舉寵爲督愚以營中之事悉以咨之必能使行陣和睦優劣得所親賢臣遠小人此先漢所以興隆也親小人遠賢臣此後漢所以傾頽也先帝在時每與臣論此事未嘗不歎息痛恨于桓靈也侍中尚書長史參軍此悉貞良死節之臣願陛下親之信之則漢室

之隆可計日而待也臣本布衣躬耕南陽苟全性命於亂世不求聞達於諸侯先帝不以臣卑鄙猥自枉屈三顧臣于草廬之中諮臣以當世之事由是感激遂許先帝以驅馳後值領覆受任于敗軍之際奉命于危難之間爾來二十有一年矣先帝知臣謹慎故臨崩寄臣以大事也受命以來夙夜憂歎恐托付不效以傷先帝之明故五月渡瀘深入不毛今南方已定兵甲已足當獎率三軍北定中原庶竭駑鈍攘除奸凶興復漢室還于舊都此臣所以報先帝而忠陛下之職分也至于斟酌損益進盡忠言則攸之禕允之任也願陛下託臣以討賊興復之效不效

則治臣之罪以告先帝之靈若無興德之言責攸之禕九等之慢以彰其咎陛下亦宜自謀以諮諏善道察納雅言深追先帝遺詔臣不勝受恩感激今當遠離臨表涕零不知所言遂行屯於沔陽六年春揚聲由斜谷道取郿使趙雲鄧芝爲疑軍據箕谷魏曹真舉衆拒之亮身率諸軍攻祁山戎陣整齊賞罰肅而號令明南安天水安定三郡並起應亮關中響震魏主獻西鎮長安命張郃拒亮亮使馬謖督諸軍在前與郃戰于街亭謖違亮節度舉動失宜爲郃所破乃拔西縣千餘家還于漢中戮謖以謝衆十一月復上言曰先帝慮漢賊不兩立王業不偏安故

託臣以討賊也以先帝之明量臣之才故知臣伐賊才弱敵彊也然不伐賊王業亦亾惟坐待亾孰與伐之是故託臣而弗疑也臣受命之日寢不安蓐食不甘味思惟北征宜先入南故五月渡瀘深入不毛并日而食臣非不自惜也顧王業不可得偏安于蜀都故冒危難以奉先帝之遺意也而議者謂爲非計今賊適疲于西又務于東兵法乘勞此進趨之時也謹陳其事如左高帝明並日月謀臣淵深然涉險被創危然後安今陛下未及高帝謀臣不如長平而欲以長計取勝坐定天下此臣之未解一也劉繇王朗各據州郡論安言計動引聖人羣疑滿腹衆



難塞胸今歲不戰明年不征使孫策坐大遂并江東此臣之未  
解二也曹操智計殊絕于人其用兵也髣髴孫吳然困於南陽  
險于烏巢危于祁連偏于黎陽幾敗北山殆死潼關然後偽定  
一時耳况臣才弱而欲以不危而定之此臣之未解三也曹操  
五攻昌霸不下四越巢湖不成任用李服而李服圖之委夏侯  
而夏侯敗先帝每稱操為能猶有此失况臣鴛下何能必勝  
此臣之未解四也自臣到漢中中間期年耳然喪趙雲陽羣馬  
玉閣芝丁立白壽劉邵鄧同等及曲長屯將七十餘人突將無  
前實與青羌散騎武騎一千餘人此數十年之內所糾合四方

之精銳非一州之所有若復數年則損三分之二也當何以圖  
敵此臣之未解五也今民窮兵疲而事不可息事不可息則往  
與行勞費正等而不及今圖之欲以一州之地與賊持久此臣  
之未解六也夫難平者事也昔先帝敗軍于楚當此時曹操拊  
手謂天下已定然後先帝東連吳越西取巴蜀舉兵北征夏侯  
授首此曹之失計而漢事將成也然後吳更違盟關羽毀敗稀  
鱗蹉跌曹丕稱帝凡事如是難可逆見臣鞠躬盡力死而後已  
至於成敗利鈍非臣之明所能逆覩也亮遂復出散關圍陳倉  
曹真拒之糧盡而還魏將王雙率騎來追亮與戰破之斬雙七

年遣陳式攻武都陰平魏郭淮率衆欲攻式亮自出至建威淮退還遂平二郡是歲孫權僭稱帝乃遣衛尉陳震慶權正號九年復出祁山以木牛運糧盡退軍與魏張郃交戰射殺郃十二年春悉大衆由斜谷出以流馬運據武功五丈原與司馬懿對于渭南每患糧不繼使已志不伸是以分兵屯田爲久住之基耕者雜于渭濱居民之間而百姓安堵軍無私焉亮數挑戰司馬懿亦表固請戰魏使辛毗持節以制之姜維謂亮曰辛佐治仗節而到賊不復出矣亮曰彼本無戰情所以固請戰者以示武于其衆耳將在軍君命有所不受苟能制吾豈千里而請戰

耶相持百餘日其年八月亮疾病卒于郭氏塢軍中時年五十

四

孫盛晉陽秋曰有星赤而芒角自東北西南流投于亮營三投再還往大還小俄而亮卒

及軍退司馬懿案行其營壘處所曰天下奇才也

漢晉春秋曰楊儀等整軍而出百姓奔告宣王宣王追焉姜維令儀反旗鳴鼓若將向宣王者宣王乃退不敢逼于是儀結陣而去入谷然後發喪宣王之退也百姓爲之諺曰死諸葛走生仲達或以告宣王宣王曰吾能料生不能料死也

亮遺命葬漢中定軍山因山爲墳冢足容棺斂以時服不須器物初亮自表後帝曰成都有桑八百株薄田十五頃子弟衣食自有餘饒至於臣在外任無別調度隨身衣食悉仰于官不別治生以長尺寸若臣死之日不使內有餘帛外有贏財以負陛下及卒如其所言亮性長于巧思損益連弩木牛流馬皆出其意推演兵法作八陣圖咸得其要云

魏氏春秋曰亮作八務七戒六恐五懼皆有條章以訓厲臣子又損益連弩謂之元戎以鐵爲矢矢長八寸一弩十矢俱發

武侯集載作木牛流馬法曰木牛者方腹曲頭一脚四足頭入領中舌著于腹載多而行少宜可大用不可小使特行者數十里羣行者二十里也曲者爲牛頭雙者爲牛脚橫者爲牛領轉者爲牛足覆者爲牛背方者爲牛腹垂者爲牛舌曲者爲牛肋刻者爲牛齒立者爲牛角細者爲牛鞅攝者爲牛鞅軸牛仰雙轅人行六尺牛行四步載一歲糧日行二十里而人不大勞流馬尺寸之數肋長三尺五寸廣三寸厚二寸二分左右同前軸孔分墨去頭四寸徑中二寸前腳孔分墨二寸去前軸孔四寸五分廣一寸前杠孔去前腳孔分墨二

寸七分孔長二寸廣一寸後軸孔去前杠分墨一尺五分大小與前同後脚孔分墨二寸七分後載剋去後杠孔分墨四寸五分前杠長一尺八寸廣二寸厚一寸五分後杠與等版方囊二枚厚八分長二尺七寸高一尺六寸五分廣一尺六寸每枚受米二斛三斗從上杠孔去肋下七寸前後同上杠孔去下杠孔分墨一尺三寸孔長一寸五分廣七分八孔同前後四脚廣二寸厚一寸五分形制如象軒長四寸徑面四寸三分孔徑中三脚杠長一尺一寸廣一寸五分厚一寸四分同

### 杠耳

亮言教書奏別爲一集景耀六年春詔爲立廟于沔陽

襄陽記曰亮初亾所在各求爲立廟朝議以禮秩不聽百姓遂因時節私祭之于道陌上言事者或以爲可聽立廟于成都者後主不從步兵校尉習隆中書郎向充等共上表曰臣聞周人懷召伯之德甘棠爲之不伐越王思范蠡之功鑄金以存其像自漢興以來小善小德而圖形立廟者多矣况亮德範遐邇勳蓋季世興王室之不壞實斯人是賴而蒸嘗止于私門廟像闕而莫立使百姓巷祭戎夷野祀非所以存德

念功述追在昔者也今若盡順民心則瀆而無興建之京師  
又偪宗廟此聖懷所以爲疑也臣思以爲宜因近其墓立之  
於沔陽使所親屬以時賜祭凡其臣故吏欲奉祠者皆限至  
廟斷其私祀以崇正禮于是始從之

秋鍾會至漢川祭其廟令軍士不得于墓所左右芻牧樵採弟  
均官至長水校尉子瞻嗣爵後同子尚戰死綿竹

襄陽記曰黃承彥者高爽開列爲沔南名士謂諸葛孔明曰  
聞君擇婦身有醜女黃頭黑色而才堪相配孔明許卽載送  
之時人以爲笑樂鄉里爲之諺曰莫作孔明擇婦止得阿承

### 醜女

諸葛氏集目錄開府作牧第一權制第二南征第三北出第  
四計算第五訓厲第六綜覈上第七綜覈下第八雜言上第  
九雜言下第十貴和第十一兵要第十二傳運第十三與孫  
權書第十四與諸葛瑾書第十五與孟達書第十六廢李平  
第十七法檢上第十八法檢下第十九科令上第二十科令  
下第二十一軍令上第二十二軍令中第二十三軍令下第  
二十四右二十四篇凡十萬四千一百一十二字臣壽等言  
臣前在著作郎侍中領中書監濟北侯臣荀勗中書令關內

侯臣和嶠奏使臣定故蜀丞相諸葛亮故事亮毗佐危國負  
阻不賓然猶存錄其言恥善有遺誠是大晉光明至德澤被  
無疆自古以來未有倫也輒刪除複重隨類相從凡爲二  
十四篇篇名如右亮少有逸羣之才英霸之器身長八尺容  
貌甚偉時人異焉遭漢末擾亂隨叔父元避難荆州躬耕于  
野不求聞達時左將軍劉備以亮有殊量乃三顧亮於草廬  
之中亮深謂備雄姿傑出遂解帶寫誠厚相結納及魏武帝  
南征荆州劉琮舉州委質而備失勢眾寡無立錐之地亮時  
年二十七乃建奇策身使孫權求援吳會權旣宿服仰備又

觀亮奇雅甚敬重之卽遣兵三萬人以助備備得用與武帝  
交戰大破其軍乘勝克捷江南悉平後備又西取益州益州  
旣定以亮爲軍師將軍備稱尊號拜亮爲丞相錄尚書事及  
備殂沒嗣子幼弱事無巨細亮皆專之於是外連東吳內平  
南中立法施度整理戎旅工械技巧物究其極科教嚴明賞  
罰必信無惡不懲無善不顯至于吏不容奸人懷自厲道不  
拾遺疆不侵弱風化肅然也當此之時亮之素志進欲龍驤  
虎視苞括四海退欲跨陵邊疆震蕩宇內又自以爲無身之  
日則未有能蹈涉中原抗衡上國者是以用兵不敢屢耀其

武然亮才于治戎爲長奇謀爲短理民之幹優於將略而所與對敵或值人傑加衆寡不侔攻守異體故雖連年動衆未能有克昔蕭何薦韓信管仲舉王子城父皆付已之長未能兼有故也亮之器能政理抑亦管蕭之亞匹也而時之名將無城父韓信故使功業陵遲大義不及蓋天命有歸不可以智力爭也青龍二年春亮帥衆出武功分兵屯田爲久駐之基其秋病卒黎庶追思以爲口實至今梁益之民咨述亮者言猶在耳雖甘棠之詠召公鄭人之歌子產無以遠譬也孟軻有云以逸道使民雖勞不怨以生道殺人雖死不忿信矣

論者或怪亮文采不豔而過于丁寧周至臣愚以爲管繇大賢也周公聖人也考之尚書管繇之謨略而雅周公之誥繁而悉何則管繇與舜禹共談周公與羣下矢誓故也亮所與言盡衆人凡士故其文指不及遠也然其聲教遺言皆經事緣物公誠之心形于文墨足以知其人之意理而有補于當世伏維陛下邁蹤古聖蕩然無忌故雖敵國誹謗之言咸肆其辭而無所草諱所以明大通之道也謹錄寫上詣著作臣臣巴平陽侯相臣陳壽上

師範曰有先侯以開滇者至侯乃集其成有後侯以治滇者

惟侯實創其始孟獲曰公天威也此言真知侯哉侯去今已千四百餘載而其蹟之在滇者爲營爲砦爲城爲臺爲池爲泉不僅數十處春秋仲與文武廟同祀則采其傳以入典故庶可慰滇人士之心其亦有合于侯之心歟○陳壽進侯集表詞委曲詳盡推見至隱其摹繪處儼然一王佐氣象或謂壽以父之故不滿于侯皆謬說也故同木牛流馬法附于傳後俾觀者知所考焉嘉慶丁卯浴佛後一日公之征南也往返曾未周歲而吾滇數千里之間無在不有其蹟亦神矣哉

節刪舊唐書雲南安撫使韋臯傳

韋臯字城武京兆人知隴州行營留守德宗狩奉天李楚琳殺鳳翔節度使張鑑叛歸朱泚始泚以范陽軍鎮鳳翔旣歸留部將半雲光以兵五百戍隴上雲光謀請臯爲帥將劫以臣泚別將翟華以告臯雲光懼率衆出奔至汧陽遇泚使曰太尉已爲天子使我以御史中丞授臯若聽固吾人也不受可遂誅之請以兵俱雲光從之臯迎勞詐受泚詔而讓雲光曰旣去復還何也對曰向未知公受命故去今還願與公同事臯曰將軍苟無他圖請釋甲以安衆雲光以臯諸生無能爲乃命士委甲仗臯



受之而內其卒明日置酒大會雲光與泚使至臯伏甲左右廡  
酒行殺之泚復拜臯鳳翔節度使臯斬其使及從騎三人縱一  
人使報泚帝授臯隴州刺史置奉義軍拜節度使以寵之貞元  
初爲劍南西川節度使初雲南蠻羈附吐蕃每入寇以蠻爲鄉  
導臯遣使招徠之稍通西南夷明年雲南款邊求內屬臯與東  
蠻鬼主驟傍苴夢衝等約絕吐蕃五年東蠻斷瀘水橋攻吐蕃  
請臯濟師臯遣精卒二千共破吐蕃於臺登殺青海太酋乞臧  
遮遮等虜隊盡巖谷死者不可勝計獲牛馬鎧仗不計遮遮尚結  
贊之子大將已叵屯柵以次降進吏部尚書夢衝復與吐蕃盟

臯遣別將蘇危召之詰其叛斬於琵琶川立次鬼主樣棄蠻部  
震服乃建安夷軍於資州俾制諸蠻城龍谿於西山保納降羌  
九年朝議城鹽州慮虜來撓襲詔臯出師牽制之臯命大將董  
勳張芬分出西山靈關破峩和踰的博嶺遂圍維州焚劔山屯  
南道帥論莽熱來援與戰破其軍於是西山八國羌女訶陵南  
水白狗道沮弱水清遠咄霸諸酋長皆因臯請入朝乃遣幕府  
崔佐時由石門趨雲南而南詔復通石門者隋史萬歲南征道  
也天寶中鮮于仲通下兵南溪道遂閉蠻徑北谷近吐蕃故臯  
復之由黎州出邛部直雲南置青溪關號曰南道詔臯統押近

界諸蠻西山八國雲南安撫使進同平章事十三年復舊州吐蕃謀擾邊臯輒破之自是曩貢臘城等九節度嬰嬰籠官諸大將皆舉部落降昆明蠻亦內附贊普怒北掠靈朔破麟州以取償帝詔臯深入以撓虜勢臯遣大將陳洎出三奇崔嘉臣趨石門邢毗略棲雞老翁城高倜逼故松州陳孝陽率蠻苴那時等攻昆明師五萬以八月出塞十月大破吐蕃轉戰千里遂圍維州吐蕃釋靈朔兵使大相論莽熱率雜虜十萬來救王師設伏以待虜乘勝深入伏兵起奮擊虜大潰生擒莽熱獻諸朝帝大悅進檢校司徒兼中書令南康郡王順宗立進檢校太尉王叔

文等干政臯遣劉闢來京師謁叔文請盡領劍南叔文不從臯知叔文多釁自以大臣可議國政上表請皇太子監國又上牋太子暴叔文之姦且勸進會大臣繼請太子受禪遂誅竄叔文等是歲臯卒年六十一贈太師諡曰忠武臯治蜀二十一年數出師凡破吐蕃四十八萬擒殺節度都督城主籠官千五百斬首五萬餘級獲牛羊二十五萬收器械六百三十萬其功烈爲西南之最善拊士卒婚嫁皆厚資之壻給錦衣女給銀塗衣簪各萬錢死者稱是其僚掾官雖顯不使還朝卽署蜀州刺史自以橫侈務蓋藏之故劉闢階其厲卒以叛朝廷欲追繩其咎

或言臯所進兵器皆鏤定秦字將以為罪陸暢言臣向在蜀知定秦匠名也議乃息暢臯所厚也初李白為蜀道難以斥嚴武暢更為蜀道易以美臯焉始臯務私其民互除租凡三歲一復蜀人德之見遺像必拜云

師範曰或謂臯撫南詔遂啓酋龍之禍而唐迄于亾嗚呼何遽至是即使繼臯者善于駕馭酋龍雖狡亦難為患如必以開邊為生事則南北宋之割地納幣稱姪稱臣何亦至于破滅乎○蜀道難非刺嚴武陸暢未必學太白也

繼之者惟李文饒高千里差強人意餘則皆為蠻所侮矣

剛節元史雲南行省瞻思丁傳

子納速刺丁次子忽辛附

賽典赤瞻思丁一名烏馬兒回鶻人別庵伯爾之裔其曰賽典赤猶言貴族也元太祖西征瞻思丁率千騎以文豹白鶻迎降命入宿衛從征伐以賽典赤呼之而不名憲宗命同塔刺璉行六部事遷燕京路總管帝伐蜀命主饋餉供億未嘗闕之世祖至元初出為四川平章宋將咎萬壽擁兵守嘉定兩軍對壘一以誠意相待將入覲萬壽請置酒為好左右皆難之瞻思丁竟往不疑將進酒左右復言未可飲笑曰若何見之小邪咎將軍能毒我其能盡毒我朝之人乎萬壽益嘆服有旨大軍見圍襄

陽各道宜進兵爲牽制計于是瞻思丁率水陸兵至嘉定順流  
縱筏斷其浮橋尋命行省興元專給糧餉十一年召還帝謂曰  
雲南朕嘗親歷比因委任失宜致遠人不服欲選謹厚者往治  
無如卿者拜命退卽訪求知雲南地理者畫其山川城郭驛舍  
軍屯險易遠近爲圖以進帝大悅遂拜平章政事行省雲南賜  
金寶無算時宗王脫忽魯方鎮雲南惑於左右言謂彼至必奪  
王權宜具甲兵爲備瞻思丁聞之先遣其子納速刺丁至王所  
請曰天子以雲南守者非人致諸國背叛故命臣來安集今事  
未敢專願王遣一人來共議王聞遽叱其下曰幾爲汝輩所誤

明日遣親臣至瞻思丁問以何禮見對曰吾等與公子偕來視  
猶兄弟請用卑幼禮見皆以名馬爲贄拜跪甚恭觀者大駭遂  
設宴陳所賜金寶飲器酒罷盡以與之還報王大喜由是開郡  
縣設長貳政令一聽其所爲乃教民播種開陂池以備水旱修  
孔子廟明倫堂講經史授學田由是文風漸興俗以貳代錢時  
初行鈔法民不便爲言於朝許仍其俗又患山路險遠盜賊出  
沒爲行者病相地置鎮鎮設土司吏一人百夫長一人往來者  
或被劫則罪之有土吏數輩至京訴其專僭狀帝怒命械送回  
籍聽治旣至脫其械且諭之曰若曹不知上以便宜命我故訴

我專僭我今不汝罪且授汝官可竭忠自贖眾叩頭謝曰誓以死報交趾叛服不常湖廣省屢征失利瞻思丁遣人持書願約為兄弟交趾王大喜親至雲南乞永為藩臣羅槃旬叛往征之有憂色或問故曰吾非憂出征也憂汝曹劫掠平民使不聊生及民叛則又從而征之耳師次羅槃城三日不降諸將請攻之瞻思丁不可遣使以理論之其主曰謹奉命越三日又不降將卒有乘城進攻者瞻思丁怒召責曰天子命我撫雲南未嘗命以殺戮也無主將命而擅攻於軍法當誅其主聞之曰平章寬仁如此吾拒命不祥乃舉國出降由是西南諸蠻翕然款附

云廣南農士貴左江李維屏右江岑從威共籍八十餘州戶四十萬來聽命蠻長每謁見為具酒食

製衣冠襪履易其卉服眾皆感悅居雲南六年卒年六十九葬鄩闡北門交趾王遣使哀經為文致祭滇人立廟祀之成宗大德元年追封咸陽王諡忠惠長子納速刺丁累官雲南路宣慰使都元帥至元十六年分帥大理以軍抵金齒蒲標曲臘緬國招徠蠻寨籍戶十二萬有奇定租賦置郵傳立衛兵歸以馴象十二入貢經世大典云至元十四年十月納速刺丁由雲南率蒙古幾焚摩些軍三千八百人征緬至江頭城招降帖木乃木晉蒙帖木巨木禿磨欲等砦上官曲臘溝折民四千孟摩愛呂民一千磨奈蒙匡黑答八刺民二萬蒙古甸甫祿保民一萬木都彈禿會其父沒世祖憂之仍以納速刺丁為民二百以天熱還師

雲南左丞建言三事一謂雲南省規措所造金箔貿易病民宜罷一謂雲南宣慰司已革而元帥府尚存今行省既兼領軍民則帥府在所當罷一謂雲南官員惟達官子弟當入質餘並宜罷又奏減合刺章冗官弛道路禁通民往來禁負販之徒毋令從征聽民伐木取材資貿易戒使臣勿擾民居悉報可二十八年調陝西平章以疾卒追封延安王 次子忽辛初以世臣子備宿衛世祖知其能累授同知河南宣慰司事河南素多盜官軍收捕失利忽辛遣土豪持檄招諭有來歸者賜之冠巾曰汝昔爲非今自歸卽良民矣俾侍左右無間已放還令遍諭其黨

數日後招集其爲首者十輩至身長各七尺餘羅拜庭下狀頗異觀者悉驚怖忽辛命吏籍其姓名爲民俾隨侍出入夜則令臥戶外時呼與飲食各喜過望羣盜聞之盡款服成宗大德元年復遷雲南右丞豪民避徭役往往投王府宿衛家有司不勝供給忽辛按元額所無者悉籍爲民去宿衛三分之一馬龍州土司謀叛陰與外賊通持所授宣勅納賊以示信事覺宗王將不問忽辛反覆研鞫得反狀竟斬之廣南沙奴素强悍宋時嘗賜以金印至今梗化忽辛遣使誘致待以禮留數月不遣曰汝欲還可納印來不得已賫印至因置酒宴勞令賫印入朝帝大

悅緬國負固不臣復遣諭曰我老賽典赤平章子也惟先訓具  
遵緬主聞之遂與使偕來獻白象一旦曰此象古來未有今聖  
德所致敢効方物既入帝賜緬主以世子號烏白蠻應輸租賦  
歲發軍致索忽辛以榜諭之不遣一卒而額賦完武宗至大元  
年遷江西平章以母老謝歸養卒封雍國公諡忠簡

師範曰仁愛之所孚甯得以時代間哉滇之婦孺走卒無不  
知有賽典赤者公蓋慈祥惻怛人也天姿高朗與耶律文正  
同爲名世之佐而其子及次子皆能繼先志沛澤于滇因錄  
公傳少爲論次倘官于滇者知考公循跡而講求之滇之民

### 庶其有瘳乎

按世祖擬王皇子于滇有阻之者帝曰雲南朕所親臨頗愛  
其風土非天命有歸思于此請分器焉帝之垂念雲南篤矣  
故其所用如公父子及張立道段實忙古帶愛魯怯烈皆卓  
然爲名臣先是兵薄大理時高泰祥逆命世祖欲屠之姚樞  
劉秉忠張文謙力諫復因夜宴樞陳宋太祖遣曹彬下南唐  
不殺一人市不易肆明日世祖據鞍呼曰汝昨夕言曹彬不  
殺事吾能爲之吾能爲之樞馬上賀曰聖人之心仁明如此  
生民之幸有國之福也既克大理命樞裂帛爲旗書止殺之

令分號街陌由是士民得相完聚樞字公茂柳城人卒諡文獻文謙字仲謙沙河人秉忠字仲晦嘗爲僧瑞州人又有述律杰以元帥治臨安好文學與虞集揭傒斯友善文雅雍容隱然一儒者大德四年徹里路總管寒寒遣姪刀温入貢爲元江判官度宗顯所誣朝廷討之失利而還乃命述律杰往諭以大義寒寒感悟遂備珍寶請增驛俸賂以黃金采女一無所受蠻人曰入我土而不爲金婦餌者元帥一人而已其時成都人普化宣慰臨安亦以忠厚廉明稱惜故牒已殘餘無可考搜錄諸人與賽典赤庶相輝映云

節刪明史雲南世守平西侯追贈黔甯王沐英傳

後嗣附

沐英字文英定遠人八歲而孤從母避兵母死太祖與孝慈皇后憐之撫爲己子姓朱氏年十八授帳前都尉守鎮江稍遷指揮使守廣信從大軍征福建破分水關略崇安別破閩溪十八寨縛馬谷保始命復姓移鎮建甯節制邵武延平汀州三衛尋遷大都督府僉事進同知府中機務繁積英年少明敏剖決無滯后數稱其才帝亦器英久之命乘傳抵熙河練諸部兵凡有不便更置以聞洪武十年充征西副將軍從將軍鄧愈出塞西略川藏耀兵崑崙功多封開國輔運推誠宣力武臣榮祿大夫



柱國西平侯食祿二千五百石子世券明年拜征西將軍討西番敗之土門峽徑洮州獲其長阿昌失納築城東籠山擊擒三副使瘦嗉子等平朶甘納兒七站拓地數千里俘男女二萬雜畜二十餘萬乃班師元國公脫火赤等屯和林數寇邊十三年命英總陝西兵出塞乃渡黃河登賀蘭山涉流沙七日至其境分四翼掩擊之而自以驍騎衝其中堅夜擊破之擒脫火赤及知院愛足等俘其全部以歸其明年又從大將軍北伐異道出古北口克灰山四部度臚胸河執李知院宣盡俘其衆尋拜征南右副將軍同永昌侯藍玉從將軍傅友德取雲南梁王遣平

章達里麻以兵十萬拒於曲靖英乘霧趨白石江霧霽兩軍相望達里麻大驚友德欲渡江英曰我兵罷懼爲所扼乃率諸軍嚴陳若將渡者而奇兵從下流濟出其陳後張疑幟山谷間人吹一銅角元兵驚擾英急麾軍渡江以善泗者先之長刀斫其軍軍却師畢濟塵良久復縱鐵騎遂大敗之生擒達里麻僵尸十餘里長驅入雲南梁王走死右丞觀音保以城降屬郡皆下獨大理倚點蒼山洱海扼龍首龍尾二關關故南詔築土酋段世守之英自將抵下關分一軍由洱水東趨上關一軍從石門間道渡河扳點蒼山而上立明旗幟英亂流斬關進山上軍亦

馳下夾擊擒段世遂拔大理分兵收未附諸蠻設官立衛守之  
回軍與友德會滇池分道平烏撒東川建昌芒部諸蠻立烏撒  
畢節二衛土酋楊苴等復煽諸蠻二十餘萬圍雲南城英馳救  
潰竄山谷中分兵摧滅之斬級六萬明年詔友德及玉班師而  
留英鎮滇中十七年曲靖亦佐酋作亂討降之因定普定廣南  
諸蠻通田州糧道二十年平浪穹蠻奉詔自永甯至大理六十  
里設一堡留軍屯田明年百夷思倫發叛誘羣蠻入寇摩沙勒  
寨遣都督甯正擊破之思倫發復寇定邊衆號三十萬英選騎  
三萬馳救置火炮及勁弩爲三行蠻毆百象被甲荷欄楯左右

挾大竹爲筒筒貯標鎗銳甚英分軍三都督馮誠前甯正左都  
指揮同知湯昭右礮弩並發象皆反走乘勝焚其砦昔刺亦者  
寇梟將也殊死鬪左軍小却英登高望之取佩刀命左右斬帥  
首左帥見一人握刀馳下恐奮呼突陳大軍乘之斬馘四萬餘  
人生獲三十七象餘象盡殪渠帥刀思郎斯郎理等各被百餘  
矢伏象背以死思倫發遁去諸蠻震懼麓川始不復梗已會頽  
國公討平東川蠻又平越州酋阿資及廣西阿赤部二十二年  
冬入朝賜宴奉天殿賞黃金二百兩白金五千兩鈔五百錠綵  
幣百疋遣還陛辭帝親拊之曰使我高枕無南顧憂者汝英也

還鎮再敗百夷於景東思倫發乞降貢方物阿資又叛擊之補衝盡俘其衆南中悉定使使以兵威諭降諸番番部有重譯入貢者英後先鎮雲南十年年四十八卒軍民巷哭遠夷皆爲流涕歸葬金陵追封黔甯王諡昭靖侑享太廟英沉毅寡言笑好賢禮士撫卒伍有恩未嘗濫殺在滇百務具舉簡守令課農桑歲較屯田增損以爲賞罰墾田至百萬餘畝滇池隘浚而廣之無復水患通鹽井之利以來商旅辨方物以定貢稅視民數以均力役疎節閼目民以便安居嘗讀書不釋卷暇則延諸儒生講說經史太祖初起時數養他姓爲子攻下郡邑輒遣之出守

多至二十餘人惟英在西南勳最大徐司馬何文輝雖名將遠不逮也子春晟昂皆鎮雲南所駙馬都尉尚成祖女常甯公主春字景春材武有父風年十七從英征西番又從征雲南從平江西寇皆先登積功授後軍都督府僉事羣臣請試職帝曰見我家人勿試也遂予實授嘗命錄烈山囚又命鞠叛黨於蔚州所開釋各數百人英卒命嗣爵鎮雲南洪武二十六年維摩十一寨亂遣瞿能等討平之明年平越鶴蠻立瀾滄衛其冬阿資復叛與何福討之春曰此賊積年逋誅者以與諸土酋姻婭展轉亾匿今悉發諸酋從軍縻繫之而多設營堡制其出入授首

必矣遂趨越州分道逼其城伏精兵道左以羸卒誘賊縱擊大  
敗之阿資亡山谷中春陰結旁近土官訶知所在樹壘斷其糧  
道賊困甚已出不意擣其巢遂擒阿資并誅其黨沙陀普也等  
二百四十人越州遂平廣南酋儂真佑糾羣蠻拒官軍破擒之  
俘斬千計甯遠酋刀拜爛依交阯不順命遣何福討降之三十  
年麓川宣慰使思倫發爲其屬刀幹孟所逐來奔春挾與俱朝  
受上方略遂拜春爲征虜前將軍率何福徐凱討之先以兵送  
思倫發於金齒檄幹孟來迎不應乃選卒五千令福與瞿能將  
踰高良公山直擣南甸大破之斬其酋刀名孟回軍擊景罕寨

賊乘高堅守官軍糧且盡福告急春率五百騎救之夜渡怒江  
旦抵寨下令騎騁揚塵蔽天賊大驚潰乘勝擊崆峒寨亦潰前  
後降者七萬人將士欲屠之春不可幹孟乞降帝不許命春總  
滇黔蜀兵攻之未發而春卒年三十六諡忠襄春在滇七年大  
修屯政闢田三十餘萬畝鑿鐵池河灌宜良涸田數萬畝民復  
業者五千餘戶爲立祠祀之無子弟晟嗣晟字景茂少疑重寡  
言笑喜讀書太祖愛之授後軍都督僉事進左都督建文元年  
嗣侯比就鎮而何福已破擒刀幹孟歸思倫發亡何思倫發死  
諸蠻分據其地晟討平之以其地爲三府二州五長官司又於

潞江西置騰衝千戶所戍之麓川遂定初岷王封雲南不法爲  
建文帝所囚成祖卽位遣歸藩益驕恣晟稍持之王怒譖晟帝  
以王故召晟戒之貽書王稱其父功毋督過令晟仍還鎮守永  
樂三年八百大甸寇邊過貢使晟會車里木邦討定之明年大  
發兵討交趾拜晟征夷左副將軍與大將軍張輔異道自雲南  
入遂由蒙自徑野蒲斬木通道奪猛烈棚華諸關隘昇舟夜出  
洮水渡富良江與輔會師共破多邦城擣其東西二都盪諸巢  
擒僞王黎季犛論功封黔國公歲祿三千石予世券交趾簡定  
復叛命晟佩征夷將軍印討之戰生厥江敗績輔再出率師合

討擒定送京師輔還而晟留捕陳季擴連戰不能下輔復出率  
師會晟窮追至占城獲季擴乃班師晟亦受上賞十七年富州  
蠻叛晟引兵臨之弗攻使人譬曉竟下仁宗立加太傅鑄征南  
將軍印給之沐氏繼鎮者輒予印以爲常宣德元年交趾復叛  
會安遠侯柳升進討升敗死晟亦退兵羣臣交劾晟帝封其章  
示之正統三年麓川思任發反晟抵金齒與弟昂及都督方政  
會兵政爲前鋒破賊沿江諸寨大軍逐北至高黎共山下再破  
之明年復破其舊寨政中伏死官軍敗績晟引還慚懼發病至  
楚雄卒贈定遠王諡忠敬晟席父兄業用兵非所長戰數不利

滇野  
朝廷以其絕遠且世將寬假之而滇人懾晟父子威信莊事如  
朝廷片楮下土酋所具威儀出郭迎盥而後啓曰此令旨也晟  
先後置圃墅田業三百六十處曰我日食其一足矣珍寶充庫  
藏後房曳羅綺者數百人役使閹奴亦百十輩而善事中貴賂  
遺執政不絕以故得中外聲晟有子斌幼嗣公爵居京師而以  
昂代鎮昂字景高初爲府軍左衛指揮僉事成祖將使晟南討  
乃擢昂都指揮同知領雲南都司累遷至右都督正統四年佩  
將印討麓川抵金齒畏賊盛遷延者久之參將張榮前驅至芒  
部敗昂不救引還貶秩二級已思任發入寇擊却之又捕斬師

宗反者六年兵部尚書王驥定西伯蔣貴將大軍討思任發昂  
主餽運賊破還昂都督命督軍捕思任發不能得驥等復出師  
索之緬甸破者藍而還十年昂卒贈定邊伯諡武襄斌字文輝  
昂卒始之鎮會緬甸執思任發送京師其子思機發來襲斌擊  
却之思機發復據孟養十三年復大發兵使驥等討之而斌爲  
後拒督餉無乏卒贈太傅諡榮康子琮幼以昂孫璘代鎮璘字  
廷章景泰初以都督同知佩印出鎮素儒雅滇人易之旣而號  
令肅然不可犯天順初卒琮猶幼璘弟璣時爲錦衣副千戶特  
命以都督同知代鎮居七年先後討平霑祿諸寨及土官之構

兵者降思卜發勒還諸蠻侵地功多然頗贖貨成化三年春琮始之鎮而以瓚爲副總兵移鎮金齒琮字廷芳通經義能詞章屬夷餽贄無所受尋甸酋殺兄子求爲守琮捕誅之廣西土官虐所部爲亂琮請更設流官民大便以次討平馬龍麗江劍川順甯羅雄諸叛蠻捕擒橋甸南窩反者卒贈太師諡武僖無子以瓚孫崑嗣崑字元中初襲錦衣指揮僉事琮撫爲子朝議以崑西平侯裔孫當嗣侯而守臣爭之謂滇人知黔國公不知西平侯也侯之恐爲所輕孝宗以爲然令嗣公佩印如故宏治十二年平龜山竹箐諸蠻又平普安賊再益歲祿正德二年師宗

民阿本作亂與都御史吳文度督兵分三道進一出師宗一出羅雄一出彌勒而別遣一軍伏盤江截賊巢遂大破之七年安南長官司那代爭襲殺土官復與都御史顧源討擒之再加太子太傅崑初喜文學自矜厲其後通落權近所要請無不得寔驕凌三司使從角門入諸言官論劾者輒得罪去卒贈太師諡莊襄紹勛崑子也既嗣封而尋甸土舍安銓叛都御史傅習討之敗績武定土舍鳳朝文亦叛與銓連兵攻雲南世宗遣尚書伍文定將大軍征之未至而紹勛督所部先進告土官子弟當襲者先予冠帶破賊立以請衆多奮搏賊大敗之朝文絕普渡

河走追斬之東川銓還尋甸衆猶盛列砦數十官軍分哨攻悉破之銓走芒部爲所執先後擒賊黨千餘人俘斬無算時嘉靖七年也捷聞加太子太傅益歲祿而是時老撾木邦孟養緬甸孟密相仇殺師宗納樓思陀八寨皆亂久不解紹勛使使者徧歷諸蠻諷以武定尋甸事皆懼伏願還侵地而木邦孟養俱貢方物謝南人悉定紹勛有勇略用兵輒勝然頗驕侈發民夫攻石大理山崩役夫多死又奪民田廣其莊都御史歐陽重連章劾之下詔詰責卒贈太師諡敏靖子朝輔嗣朝輔素驕貴既嗣封都御史劉渠索賂朝輔與之因上章言臣家世守茲土上下

相承近有司紛更典制關臣職守率不與聞接見不循故例臣疎遠孤危動多掣肘無以彈壓蠻方乞申勅諸臣悉如其舊詔許之朝輔益驕給事中萬虞愷劾朝輔並論渠詔罷渠而令朝輔治事如故卒贈太保諡恭僖朝弼朝輔弟也朝輔卒二子融鞏皆幼詔視琮璘故事令融嗣公給半祿而授朝弼都督僉事佩印代鎮居三年融卒鞏當嗣朝弼心害之於是朝弼嫡母李請護鞏居京師待其長而還鎮報可鞏未至京卒朝弼遂得嗣嘉靖三十年元江土舍那鑑叛詔朝弼與都御史石簡討之分五軍薄其城城垂拔以瘴發引還詔罷簡將再出師鑑懼仰藥



死乃已四十四年討擒叛蠻阿方李向陽又明年平武定叛酋  
鳳繼祖破賊巢三十餘朝弼素驕事母嫂不如禮奪兄田宅匿  
罪入蔣旭等用調兵火符遣人訶京師乃罷朝弼以其子昌祚  
嗣封給半祿朝弼怏怏益放縱葬母至南京都御史請留之詔  
許還滇毋得預滇事朝弼恚欲殺昌祚撫按交章言狀並發其  
殺人通番諸不法事逮繫詔獄論死援祖功免錮南京竟死昌  
祚初以都督僉事總兵鎮守久之嗣公萬曆元年姚安蠻羅思  
等叛殺郡守昌祚與都御史鄒應龍發土漢兵討之破向寧鮮  
摩等十餘寨犁其巢盡得思等十一年隴川蠻岳鳳挾緬甸以

叛旁近土司並遭兵昌祚壁洱海督裨將鄧子龍劉綎等斬木  
邦叛酋罕虔以暑瘴退師明年復攻罕虔故巢三道並入擒其  
酋罕招等又破緬兵於猛臉岳鳳降論功加太子太保悉食故  
祿復以次平羅雄諸叛蠻再賜銀幣孟養思氏迸入於緬導緬  
兵攻猛廣於是大集兵壁永昌緬人遁追擊至那莫江瘴作而  
還二十一年緬人復入寇昌祚逐之連戰俱捷會羣蠻內亂乃  
解兵沐氏鎮雲南久威權日盛尊重擬親王巡撫大臣往謁及  
門下車藩司以下蔑如也昌祚出僉事楊煥秋不避道昌祚笞  
其輿人寅秋訴於朝下詔切責革鎮守以子叡代鎮武定土酋

阿克叛攻會城脅府印以去敵被逮下獄昌祚復理鎮事卒孫  
啟元嗣卒子天波嗣天波嗣封十餘年而土司沙定洲作亂天  
波奔永昌亂定復歸於滇永明王至滇天波任職如故從奔緬  
甸緬人欲劫之不屈死初沙定洲之亂天波母陳氏妻焦氏自  
焚死比天波奔緬妾夏氏不及從自縊死踰數十日收葬支體  
不壞人以爲節義所感焉

師範曰沐氏鎮雲南直與明祚相終始三代以下所鮮見也  
迄今已百五十年矣而滇中土人猶自懾其餘威引爲口實  
傳世十四而天波以走死母妻與妾咸殉昭靖之澤遠哉

按滇于夏商周已入版圖沿漢及唐咸爲置吏雖蒙段竊壤  
時通中國迨元世祖三路並進取大理爲伐宋先聲旋命梁  
段分治開闢之廣迥越前代特設南選以待土王子充寓滇  
逆旅主人亦知向學其規模尙有可想者自傅藍沐三將軍  
臨之以武胥元之遺黎而蕩滌之不以爲光復舊物而以爲  
手破天荒在官之典冊在野之簡編全付之一燼旣奏遷富  
民以實滇于是滇之士著皆曰我來自江南我來自南京考  
公孫述時犍牯大姓龍傳尹董與功曹謝暹保境由番禺江  
貢世祖于河北武侯定南中配焦雍婁爨孟量毛李爲五都

尉南人有四姓五子之稱皮羅閣建十賧以張王李趙楊周  
 高段何蘇龔尹十二姓居之袁滋過河東州趙郡今謂村邑連  
 薨溝塍彌望大族有王楊趙李四姓乃造造華豈失本源而  
 甘以他產為詞是皆沐氏之餘威有以懾之也楊用修謂馴  
 鱗介而衣裳列箐落而郡縣顧亭林謂化雞犬為鹿鶴變惡  
 濁為清涼馴不及舌無乃言過其實歟漢武帝徒甌閩之人  
 而墟其地吳諸葛恪始開山越今皆為名郡滇詎不若哉予  
 晉人而籍滇已十三世故為之論云嘉慶庚午大暑後八日  
 補書于吉水鎮寓館

節剛明史征南將軍潁國公傅友德傳

傅友德其先宿州人後徙碭山元末從大盜李喜善入蜀喜善  
 敗從明玉珍玉珍不能用走武昌從陳友諒為別將無所名  
 太祖攻江州至小孤山友德率眾降帝奇之用為將從援安豐  
 略廬州還從擊友諒於鄱陽湖輕舟挫其前鋒被數創戰益力  
 復與諸將邀擊於涇江口既殲友諒從征武昌城東南高冠山  
 下瞰城中諸將相顧莫敢登友德率數百人一鼓奪之流矢中  
 頰復洞脅不為沮武昌平授雄武衛指揮使從徐達拔廬州別  
 將克彝陵衡州襄陽攻安陸被九創破擒其將任亮從徐達下

淮東破張士誠援兵於馬騾港獲戰艘千復大破元將竹貞於  
安豐同陸聚守徐州擴廓遣將李二來攻兵寡度不敵遂堅壁  
訶其出掠以二千人沂河至呂梁登陸擊之刺其驍將韓乙敵  
敗去度且復三亟還城開門而陣於野臥戈以待約聞鼓聲則  
起二果至鳴鼓士躍起搏戰破擒二進江淮行省參知政事從  
大將軍達北征破沂州下青州元丞相也速來援以輕騎誘敵  
入伏奮擊敗走之遂取萊陽東昌明年從定汴洛收諸山寨渡  
河取衛輝彰德至臨清獲元將爲嚮導取德滄州既克元都偵  
邏古北隘口守盧溝橋略大同還下保定真定從攻山西克太

原擴廓自保安來援萬騎突至友德以五十騎衝却之因夜襲  
其營擴廓倉卒遁去追至土門關獲其士馬萬計復敗賀宗哲  
於石州敗脫列伯於宣府從攻張思道下鞏昌臨洮會大將軍  
圍慶陽以偏師駐靈州遏其援兵遂克慶陽還賜白金文綺又  
從大將軍擣定西大破擴廓移兵伐蜀領前鋒出一百八渡奪  
略陽關遂入沔分兵自連雲棧合攻漢中克之還軍西安蜀將  
吳友仁寇漢中友德以三千騎救之徑黑龍江攻斗山寨令軍  
中人持十炬燃於山上蜀兵驚遁洪武三年冬授開國輔運推  
誠宣力武臣榮祿大夫柱國同知大都督府事封潁川侯食祿

千五百石予世券未幾充征虜前將軍與征西將軍湯和分道  
伐蜀和率廖永忠等以舟師攻瞿塘友德率顧時等以步騎出  
秦隴太祖諭友德曰蜀人聞我西伐必悉精銳東守瞿塘北阻  
金牛以抗若出不意直擣階文門戶旣隳腹心自潰兵貴神速  
患不勇耳友德疾馳至陝集諸軍揚聲出金牛而潛引兵趨陳  
倉攀援巖谷晝夜行抵階州敗蜀將丁世珍克其城蜀人斷白  
龍江橋友德修橋以渡破五里關遂拔文州渡白水江趨綿州  
時漢江水漲不得渡伐木造戰艦欲以軍聲通瞿塘乃削木  
牌數千書克階文綿日月投江水順流下蜀守者見之皆解體

初蜀人聞大軍西伐丞相戴壽等果悉眾守瞿塘及聞友德破  
階文擣江油始分兵援漢州以保成都未至友德已破其守將  
向大亨於城下謂將士曰蜀人破膽援兵至無能爲也迎擊壽  
等大敗之遂拔漢州進圍成都壽等以象戰友德令強弩火器  
衝之身中流矢不退將士殊死戰象反走躡藉死者甚眾壽等  
聞其主明昇已降乃籍府庫倉廩面縛詣軍門成都平分兵徇  
州邑未下者克保甯執吳友仁送京師蜀地悉定友德之攻漢  
州也湯和尚顛軍大溪口旣得木牌於江流乃進師而戴壽等  
撤其精兵西救漢州留老弱守瞿塘故永忠等得乘勝擣重慶

縛明昇於是太祖製平西蜀文盛稱友德功爲諸將第一師還  
受上賞五年副征西將軍馮勝征沙漠敗失刺罕於西涼至永  
昌敗朵兒只巴獲馬牛羊十餘萬略甘肅射殺平章不花降太  
尉鎖納兒等至瓜沙州獲金銀印及雜畜二萬而還是時師出  
三道獨友德全勝以主將勝坐小法賞不行明年復出雁門爲  
前鋒獲平章鄧亨羅帖木兒還鎮北平陳便宜五事皆從之召  
還從太子講武於荆山益歲祿千石九年副中山侯和破擒伯  
顏帖木兒於延安降其衆帝將征雲南命友德巡行川蜀雅播  
之境修城郭繕關梁因兵威降金筑普定諸山寨十四年副大

將軍達出塞討乃兒不花渡北黃河襲灰山斬獲甚衆其年秋  
充征南將軍率左副將軍藍玉右副將軍沐英將步騎三十萬  
討雲南至湖廣分遣都督胡海洋等將兵五萬由永甯趨烏撒  
而自率大軍由辰沅趨貴州克普定普安降諸苗蠻進攻曲靖  
大戰白石江擒元平章達里麻遂擊烏撒循格孤山而南以通  
永甯之兵遣兩將軍趨雲南梁王把而刺九爾密走死友德城  
烏撒羣蠻來爭奮擊破之得七星關以通畢節又克可渡河降  
東川烏蒙忒部諸蠻烏撒諸蠻復叛討之斬首三萬餘級獲牛  
馬十餘萬霽翠宋欽皆降蠻地遂平進封穎國公食祿三千石

予世券十九年東川蠻叛復爲征南將軍率師討之破越州叛  
酋阿資平平越諸叛苗還練兵北平從燕王出古北口副大將  
軍馮勝襲納哈出於金山降其衆二十一年再討曲靖普安二  
十三年征沙漠擒乃兒不花還駐開平復征甯夏明年征哈者  
舍利遣元遼王軍行遠令班師敵不設備因潛師深入至黑嶺  
寒山大破敵衆而還再出練兵山陝屯田事命兼太子太師尋  
遣還鄉友德暗啞跳盪身言石矢自偏禪至大將每戰必先士  
卒雖被創戰益力以故所至立功帝屢敕獎勞子忠尚壽春公  
主女爲晉世子濟熺妃二十五年副宋國公勝練軍山西河南

明年偕召還又明年賜死宏治中晉王爲友德五世孫瑛援六  
王例求襲封下禮官議不許福王時追封友德麗江王諡武靖  
祀功臣廟

師範曰白石江之捷吾 始祖武德將軍毓秀公亦在行間  
隸麾下嘗言滇之平公爲首庸西平實次之其與鶴慶知府  
董賜書云大丈夫之處世當磊磊落落出羣不羈然後能拔  
淤泥脫塵埃策勳當時垂名竹帛飄然立於凡品之上亦猶  
騏驥伏櫪鸞鳳棲柵其始也雖與駑駘同豢雞鶩共食一日  
遇伯樂振羽 翻終能馳騁長途而翱翔雲表也昆明去中華

萬餘里元之季天下鼎沸我大明受命海內維新梁邸以餘孽保據其地不遵聲教者十有四載天兵南下問罪討惡余忝弔伐之任受鉞專征辛酉冬戰於曲靖之墟大破其衆擒其總戎轉開烏撒遂平諸部梁邸計窮出奔而殞其他豪傑或降或叛或就誅戮或被囚執者相半于時足下以前安甯知州來見於稠人之中余目而異焉遂加盼矚仍試以事繼而招降撫順殺輯遺黎頗著誠欵達官貴人咸稱其能于是乃復其任使保妻子焉壬戌春烏蠻構釁流毒邊境余與諸將分兵致討時有大理起到士官高生等悉寓桂城欲俟途

平俾今朝覲而閩帥不仁失於撫字致令驚疑接踵而遁及至本土遂爲仇讎舉兵相向攻我城邑殺我吏士日甚一日轉加昌熾閩帥莫制足下介在羣兇之中確守歲寒之節斥其奸謀誅其來使獨挾妻孥昌亦入滇復與列校分守城壘投放矢石城之所以存者與有功也副將軍西平侯聞難來赴誅鋤芟刈羣蠻復定余至滇西平侯備述其事余甚嘉之然此豈古人所謂不遇盤根錯節何以別利器歟抑士之始遇驥之始知歟余征大理足下又率鄉曲子弟五百餘人爲師前道招徠劔麗降伏西番威聲頗振有功必報古之道也



奚新舊爲乃奏天子授足下以專城之任任足下以牧守之  
官保障大理爲滇外戶恩亦至矣榮亦甚矣此正持盈守成  
之時也可不勉歟古人有云贈人以言余深慕之余雖武臣  
數聽教於君子矣足下其宜訓兵務農嚴紀律著恩威毋暴  
橫而欺良毋縱驕逸而墮前功上下相承共寧斯土以副國  
家任用之意策勳垂名不其偉歟茲因師旋留言以誠惟足  
下勉之又答段世札義正詞嚴已見別帙俱有兩漢風格升  
菴楊氏謂公身先甲士手草羽檄今讀兩書想見據蓋染翰  
顧盼自雄之概宜其軍聲所指動卽克捷遑論他將雖徐常

又何加焉乃竟不得其死明真少恩哉予嘗詠朱祖有句云  
論相終思誠意伯藏弓誰惜穎川侯蓋悲之也丙寅八月廿  
三日

洪武八年詔諭大理曰始因有元失馭海內雲擾華夷無主  
朕自洪武元年戊申八月羣雄盡平復我故疆統一中夏經  
今七年四夷中國皆已通報無不稱臣惟爾大理不見國王  
名號未嘗遣使今年秋翰林承旨詹同奏閱羣書方見西南  
大理昔在唐宋受封王爵爲元削去國名止稱土官其地乃  
元君遺派王者主之朕會臣僚議依唐宋所封以爾段氏爲

大理國王今特遣官往諭如遵朕命使回卽再遣使者專齎寶印誥命令爾君臣開設國事同享昇平之福如果不然他日兵會西南未知勝負何如爾其審之按此詔乃明祖自撰始欲借段以攻梁逮梁平而段亦隨舉潁公之檄段明日我決直搗巢穴斬草不遺然後築城鎮興屯田立府定縣編僉戶役軍民兩馭萬年無窮豈有糧絕馬病將獨兵亡者哉汝能詩識墨不比冥頑速回書來兵勢難待蓋段書未有方今天下平猶易自古雲南守獨難之句而異日措置咸如所言公之績偉矣

刪節明史右都督方政傳

方政全椒人襲濟陽衛千戶以靖難功屢遷都指揮僉事永樂四年充鷹揚將軍從張輔平交趾還與都指揮朱廣移師廣西會都督韓觀討平柳潯諸蠻斬獲萬計七年復從輔征交趾敗簡定黨阮世每於鹹子關蹙鄧景異海州擒其將范必粟景異遁九年秋復以步隊從輔敗賊阮帥等擒僞將軍四人進都指揮使十年春窮追景異至吒蒲幹冊射中其脇擒之并獲其黨鄧幹等進都督同知十六年嘉興州賊車絲之車三等叛政大破之明年夏與都指揮師祐敗賊黎利於可藍冊擒僞將軍

阮箇立等利走老搃其冬斬鄭公証於同利仁宗卽位命充參將與榮昌伯陳智協同鎮守初李彬討羣寇交陞漸無事彬卒智繼之暗懦無將略反者四起而鎮守中官山壽一意撫賊專進止政又爲智所忌議事多不協以故賊益得志官軍不能制宣德元年春與智討黎利於茶籠州敗績詔以成山侯王通代智政削職充爲事官時政守乂安賊攻之急都指揮王演擊却之帝厚賞演特原政罪其秋與安平伯李安都指揮于瓚謝鳳等連兵討黎利復敗績政還守乂安利乘勝攻城晝夜不息力戰敗之已王通擅與賊和引兵還政亦論死繫獄籍其家踰年

釋爲都督僉事尋以副總兵備禦開平獨石言便宜四事皆報許七年春政以西猫兒峪當寇衝無城遣千戶楊洪率騎士屯田帝善之因諭兵部曰制敵莫善城守朕委政邊事不從中制也已奏內官蕭愚擅威福帝怒切責愚明年以總兵官鎮守松潘番叛諭以禍福多聽命惟仕昌巴諸黑虎諸寨梗化政擊其西北大寨破之副將蔣貴等以次平諸寨政撫逋亾者皆復業進都督同知復奏行便宜四事十年移鎮大同中官郭敬誣政專擅楊士奇等言政勤廉公正善撫士敬貪縱其言誣也於是降敕責敬其秋劾副總兵曹儉罪奪其職正統元年上言征調

海粟  
軍士應支口糧行糧者不當減其月糧軍餘墾地已許免稅不當復徵屯田歉收請量蠲免詔並允行尋進右都督三年將兵助沐晟討麓川思任發師次金齒賊沿江立柵政等造舟濟奮擊敗之偕諸將追奔斬三千餘級明年正月進破思任發舊大寨追至空泥賊驅象陣政力戰不支一軍皆沒晟聞退師永昌政廉勇善戰號良將宥死錄用益感奮竟死敵賊平贈威遠伯諡忠毅子瑛亦以功封南和伯

師範曰是役也沐晟為帥當政戰勝時晟銜其謀非已出且猶冀思任之可撫迨政遇伏求援故以少師往亦未與蠻遇

而政遂突圍以死使當日晟果全軍飛濟則蠻必大創蠻創則王驥之三征可罷矣夫兵貴審機機失雖孫吳亦難置力忌功僨事沐定遠且然况下此者哉

政嘗為張英公輔部將三下安南已悉晟之底蘊况七十老翁臣精已亡故敢違節制奮勇直前成則必如其功敗亦樂觀其禍使為晟者能如其兄忠襄公春之馳救何福焉有此失政之死實晟死之乃晉顯爵獲美諡其亦王振之所為歟史稱英好賢禮士晟喜讀書然括膏腴為勳庄設冠帶庄總理事民遂無向學者吾彌渡其一也吳逆繼之二百年竟無

人物可紀康熙辛酉平滇 新政既頒歐陽公方舉于甲子  
後官工部主事繼此則登甲榜者十七人乙榜百餘人詞館  
三人臺諫二人內至學士外至監司典試督學屢膺上選沐  
氏之爲沐氏不已可知哉○謝在杭謂與政同死者猶有指  
揮顧勇陳翊侯義江洪至大理衛指揮陳定鶴慶百戶李繼兒  
及子轅俱征麓川死于陣臨安百戶邵鑑上江之戰亦死于  
麓川楚雄指揮吳繼勛鶴慶千戶初維垣永昌把總李潮岳  
順皆先後死于緬同知袁俸照磨張成知州秦健吏目劉瑀  
死于鳳朝文知事高心巡檢俞伯官死于鳳繼祖

剛節明史雲南巡撫楊繼宗傳

楊繼宗字承芳陽城人天順初舉進士授刑部主事囚多疫死  
爲時其食飲令三日一櫛浴全活者甚衆又善辨疑獄河間獲  
盜遣里民張文郭禮送京師盜逸文謂禮曰吾二人竝當死汝  
母老鮮兄弟以我代盜庶全汝母子命禮泣謝從之文桎梏詣  
部繼宗察非盜竟辨出之成化初用王翱薦擢嘉興知府以一  
僕自隨署齋蕭然性剛廉孤峭人莫敢犯而時時集父老問疾  
苦爲祛除之大興社學民間子弟八歲不就學者罰其父兄遇  
學官以賓禮師儒競勸文教大興御史孔儒清軍里老多撻死

繼宗榜曰御史杖人至死者詣府報名儒怒繼宗入見曰爲治有體公但剔奸弊勸懲官吏若比戶稽核乃有司事非憲體也儒不能難而心甚銜之瀕行突入府署發篋視之敝衣數襲而已儒慙而去中官過者繼宗遺以菱芡厯書中官索錢繼宗卽發牒取庫金曰金具在與我印券中官咋舌不敢受入覲汪直欲見之不可憲宗問直朝覲官孰廉直對曰天下不愛錢者惟楊繼宗一人耳九載秩滿超遷浙江按察使數與中官張慶忤慶兄敏在司禮每於帝前毀繼宗帝曰得非不私一錢之楊繼宗乎敏惶恐遺書慶曰善遇之上已知其人矣聞母喪立出止

驛亭下盡籍廨中器物付有司惟攜一僕書數卷而還服除以右僉都御史巡撫順天畿內多權貴莊田有侵民業者輒奪還之按行關塞武備大飭星變應詔陳言厯指中官及文武諸臣貪殘狀且請召還中官出鎮者益爲權貴所嫉治中陳翼計其過權貴因中之左遷雲南副使孝宗立遷湖廣按察使旣至命汲水百斛洗滌廳事而後視事曰吾以除穢也居無何復以僉都御史巡撫雲南三司多舊僚相見歡然旣而出位揖之曰明日有公事諸君幸相諒遂劾罷不職者八人未幾卒繼宗力持風節而居心慈厚自處必以禮爲知府謁上官必衣繡服朝覲

海豐  
謁吏部亦然或言不可笑曰此朝廷法服也此而不服將安用  
之爲浙江按察時倉官十餘人坐缺糧繫獄至鬻子女以償繼  
宗欲寬之而無由一日送月俸至命量之則溢原數較他司亦  
然因悟倉吏缺糧之由將其實以聞衆懼請於繼宗願捐俸代  
償由是十人者獲釋其在嘉興決疑獄數十件人皆以爲神又  
嘗監鄉試得二卷具朝服再拜曰二子當大魁天下吾爲朝廷  
得人賀耳及拆卷王華李旻也後果相繼爲狀元天啓初追諡  
貞肅

師範口陳士業傳載公守嘉興日數忤孔御史暨諸權貴及

中璫羣謀中傷之乃以韓參政某分巡嘉湖陰誦其事無所  
得惟於先一年郡邑無秋道殣踵相接公發粟賑之不以聞  
韓譙此爲公罪據凡作牘將往按吏書牘竟展閱間風暴作  
揭牘起空中韓仰面觀大詬其吏忽蒼鷹振天來從之者數  
十攫而抓且啄之紛如雨紙韓怒曰若固楊繼宗黨邪吾必  
親按徑登舟鷹亦隨至俄而百俄而將干韓益怒呼兵勇獵  
之弓者弩者石擊者彈者網者手愈多鷹愈聚一老鷹張拳  
捩韓冠而去衆鷹爭相抓啄如其牘于是韓始駭異事獲寢  
因憶 本朝順治末大梁周侍郎亮工以閩事爲人所搆擬

重典九卿會讞方對簿文卷被風掣去主者以告特邀赦宥  
與此極相類然周更有難者蓋此則毒機甫發周則爰書已  
定耳夫人果抱忠直之悃禍患危急其間必有默相之者孰  
謂天聽之盡高乎楊公撫滇未一載遽卒于官滇志佚其事  
並姓氏亦失之正史尚在功何可誣也觀其劾去舊僚八人  
凜凜乎包侍制之遺風焉以較世之貌寬厚習圓通而黷貨  
者使與公遇必啐其面矣

公嘗曰豪強貴勢人皆畏之我獨不畏金錢貨幣人皆不畏  
我獨畏之語雖粗質其風節已可概見

刪節明史雲南巡撫後陞吏部尚書王恕傳

王恕字宗貫三原人正統十三年進士選庶吉士出爲大理左  
評事進左寺副嘗條刑罰之不中者六事皆議行之遷揚州知  
府發粟賑饑不待報作資政書院大興文教天順四年以治行  
最超遷江西右布政使平嶺寇贛州憲宗嗣位詔大臣嚴覈天  
下方面官乃黜河南左布政使侯臣等十三人而以恕代臣成  
化初南陽荆襄流民嘯聚爲亂擢恕右副都御史撫治之會丁  
母憂詔奔喪兩月卽起視事恕辭不許與尚書白圭共平大盜  
劉通復討破其黨石龍嚴東所部毋濫殺流民復業移撫河南



錄功進左副都御史稍遷刑部右侍郎父憂服除以原官總督河道浚高郵邵伯諸湖修雷公上下句城陳公四塘水閘因災變請講求弭災策帝爲賜山東租一年畿輔亦多減免旋改南京戶部左侍郎十二年大學士商輅等以雲南遠在萬里西控諸夷南接交趾而鎮守中官錢能貪恣甚議遣大臣有威望者爲巡撫以鎮之乃改恕左副都御史以行就進右都御史初能遣指揮郭景奏事京師言安南捕盜兵有越人雲南境者宜遣使齎敕戒約之帝卽以命景能因以玉帶寶纁蟒衣珍奇諸物遺其王黎灝舊制使安南必由廣西而景直自雲南往灝大駭

已見能所遺物則又喜報以生金通犀象齒及諸奇異物甚厚因遣將率兵送景還欲遂通雲南道景懼後禍結請先白守關者因脫歸揚言安南寇至關吏戒嚴邊民洶洶欲走避黔國公連遣人諭其帥兵始返而諸臣畏能匿不奏能又頻遣景及指揮盧安蘇本等交通干崖孟密諸土官納其金寶無算恕皆廉得之遣騎執景景懼自殺繫安等獄沒其貲貨劾能私通外國罪當死詔遣刑部郎中潘蕃往按之能又以其間驛進黃鸚鵡恕請禁絕因盡發能貪暴狀且言昔交趾以鎮守非人致一方陷沒今日之事殆又甚焉陛下何惜一能不以安邊徼能大懼

急屬貴近請召恕還而是時商輅項忠諸正人方以忤汪直罷  
遂改恕掌南京都察院參贊守備機務能事立解已蕃勘上得  
實竟置能不問但抵安等罪恕居雲南僅九月威行徼外黔國  
以下咸惕息奉令疏凡二十上直聲動天下當是時安南納江  
西叛人王姓者爲謀主潛遣諜人臨安市銅鑄兵器欲伺間襲  
雲南微恕事且不測還南京數月遷兵部尚書參贊如故考選  
官屬嚴拒請託同事者咸不悅而錢能歸屢譖恕於帝帝亦銜  
恕數直言遂命兼右副都御史巡撫江南舊制應天鎮江太平  
甯國廣德官田徵半租民田全免其後民田率歸豪右而官田  
累貧民恕乃量減官田耗稻增之民田常州時有羨米乃奏以  
六萬石補夏稅又補他府戶口鹽鈔六百萬貫公私便焉所部  
水災奏免秋糧六十餘萬石周行賑貸全活二百餘萬口江南  
歲輸白糧民多至破產而光祿槩以給庖人賤工又中官暴橫  
四方輸上供物監收者率要羨入織造繒絲采花卉禽鳥者絡  
繹道路恕先後論列皆不納妖人王臣黃綠授錦衣千戶隨中  
官王敬南行採藥物珍玩所至騷然長吏多被辱勒蘇州諸生  
寫妖書諸生王順等不勝憤率衆擊之敬臣皆走匿毆其從者  
敬遂奏諸生抗命恕亟疏言當此凶歲宜遣使賑濟顧乃橫索

玩好昔唐太宗諷梁州獻名鷹明皇令益州織半臂褶子進琵琶捍撥鏤牙合子諸物李大亮蘇頲不奉詔臣雖無似有慕斯人因盡列敬等罪狀敬亦誣奏恕并及常州知府孫仁仁被逮仁新淦人由進士歷知府爲人方峻敬至不爲禮以是見忤恕抗章救又再劾敬帝不得已召敬還敬宿留徐州恕復劾之會中官尚銘亦發敬奸狀乃下敬等獄併其黨十九人皆謫戍而棄臣市傳首南京仁亦得釋歸後積官至巡撫甯夏右副都御史二十年復改恕南京兵部尚書時錢能亦守備南京語人曰王公天人也吾敬事而已恕亦坦懷待之能卒斂戢林俊之下

獄也恕言天地止一壇祖宗止一廟而佛至千餘寺一寺立而移民居且數百家費內帑且數十萬此舛也俊言當不宜罪帝得疏不懌恕益侃侃論列無少避先後應詔陳言者二十一建白者三十九皆力阻權倖天下傾心慕之遇朝事有不可必曰王公胡不言也則又曰公疏且至矣已恕疏果至時爲謠曰兩京十二部獨有一王恕於是貴近皆側目帝亦頗厭苦之二十二年起用傳奉官恕諫尤切帝愈不懌恕先加太子少保會南京兵部侍郎馬顯乞罷忽附批落恕宮保致仕朝野大駭恕數爲巡撫歷侍郎至尚書皆在留都以好直言終不得立朝旣歸

名益高臺省推薦無虛月孝宗卽位始用廷臣薦召入爲吏部尚書尋加太子少保先是中外劾內閣劉吉者必薦恕吉以是大恚凡恕所推舉必陰撓之宏治元年閏正月言官劾兩廣總督宋旻漕運總督邱鼐陝西山西山東遼東巡撫賈爽左鈺吳節劉潺兩京府尹吳玘于冕及布政使夏寅周瑛盧雍秦夔等三十七人宜降黜中多素有時望者吉徑取中旨允之章不下吏部恕以不得其職拜疏乞去不許陝西缺巡撫恕推河南布政使蕭禎詔別推恕執奏曰陛下不以臣不肖任臣銓部倘所舉不效臣罪也今陛下安知禎不才而拒之是必左右近臣意

有所屬臣不能承望風指以固祿位且陛下旣以禎爲不可用是臣不可用也願乞骸骨帝乃卒用禎時言官多稱恕賢且老不當任劇職宜置內閣參大政最後南京御史吳泰等復言之帝曰朕用蹇義王直故事官恕吏部有謀議未嘗不聽何必內閣也恕嘗侍經筵見帝困熱暑請依故事大寒暑暫停仍進講義於宮中進士董傑御史湯鼐給事中韓重等遂交章論駁恕待罪請解職優詔不許恕上言臣蒙國厚恩日夕思報外人見陛下任臣過重遂望臣太深欲臣盡取朝政更張之如宋司馬光故事無論臣才遠不及光卽今亦豈元祐時且六卿分職各

有攸司臣豈敢越而謀之但傑等責臣良是臣無所逃罪惟乞  
放還帝復優詔勉留之恕感激眷遇益以身任國事方以疾在  
告聞帝頗擢用宦官至有賜蟒衣給莊田者具疏切諫中官黃  
順請起復匠官潘俊等供役恕言不可以小人壞重典再執奏  
竟報許劉吉既憾恕吉所陷言官周紘張昺湯鼐姜綰等恕又  
抗章力救吉以是益恨乃合私人魏璋等共排之恕先後推用  
羅明熊懷強珍陳壽邱鼐白思明等咸諷璋等糾駁恕知志不  
得行連章求去帝輒慰留且以其老特免午朝遇大風雨雪早  
朝亦免徽王見沛乞歸德州田已得言恕言王國懿親不當爭

尺寸地使小民失業帝婉辭報焉盧溝橋成中官李興乞進文  
思院副使潘俊等官恕言營造常職安得錄功前此未聞成化  
之季始有之陛下初政已革汰奈何復行帝納其言乃止已修  
京城河橋帝復從興請將有除授恕執奏帝不從竟授四人官  
許五人冠帶恕爭曰臣職掌銓選義當盡言而再疏莫回天聽  
以爲業已許之不可易夫天下事必當而後已設未當雖十易  
何害不然流弊有不可救者報聞先後以災異條七事以星變  
陳二十事咸切時弊壽甯伯張巒請勲號誥券恕言錢王兩太  
后正位中宮數十年錢承宗王源始邀封爵今皇后立甫三年

繼已封伯遠有此請累聖德不可許通政經歷高祿巒妹壻也  
超遷本司參議恕言天下之官以待天下之士勿私貴戚妨公  
議皆不納中旨以御醫徐生補院判而生前考校在次等恕請  
選上考者且治生夤緣罪論令會禮部太醫院及御藥房太監  
推擇恕言銓法臣部職會中官非制帝命罷選竟用生言官交  
劾生不聽文華殿中書舍人杜昌等夤緣遷秩恕力爭寢之御  
醫王玉自陳乞進官恕請置之理帝命進玉二秩後有如玉者  
逮之恕復力爭事亦竟寢是時劉吉已罷邱濬入閣亦與恕不  
相能初濬以禮部尚書掌詹事府與恕同爲太子太保恕長六

鄉位濬上及濬入閣恕以吏部弗讓也由是濬不悅恕考察天  
下庶官已黜而濬調旨留之者九十餘人恕屢爭不能得因力  
求罷不許太醫院判劉文泰者求遷官爲恕阻銜之文泰故往  
來濬家知濬忤恕因劾恕變亂選法且言恕里居日屬人作傳  
鏤板行之歷數先帝之失於奏疏留中者槩云不報以彰先帝  
拒諫無人臣禮恕知文泰受旨於濬乃言臣傳作於成化二十  
年致仕在二十二年非有望於先帝也且傳中所載皆足昭先  
帝納諫之美何名彰過文泰無賴小人逞此機深文巧之辭必  
有老於文學多陰謀者主之乞賜廷鞫遂下文泰錦衣獄讞上

言文泰奏章實除名都御史吳禎爲潤色濬亦力懇憲之疏首  
所云沽直謗君則濬筆也因請逮濬恕及禎對簿帝心不悅恕  
乃貶文泰御醫責恕沽名令焚所鏤版置濬不問恕再疏請辨  
理不從遂連章求去聽馳驛歸不賜勅月廩歲隸亦頗減恕敷  
歷中外五十餘年剛正清嚴始終一致所引薦耿裕彭韶何喬  
新周經李敏張悅倪岳劉大夏戴珊章懋等皆一時名臣他賢  
才久廢草澤者拔擢之恐後宏治二十年間衆正盈朝職業修  
理號爲極盛者恕力也天下稱名臣必首恕濬顧尼之濬由是  
爲衆論所鄙又二年濬卒文泰往弔濬妻顧氏叱之出曰以若

故使我相公齟王公負不義名何弔爲聞者快之武宗嗣位遣  
行人齎手勅存問賚羊酒益廩隸且諭以讜論無隱恕陳國家  
大政數事帝優詔報之正德三年卒年九十三平居食噉兼人  
卒之日小減閉戶獨坐忽有聲若雷白氣瀾漫矚之瞑矣訃聞  
輟朝贈特進左柱國太師諡端毅

師範曰猛虎在山藜藿不采蓋言威也商文毅以錢能驕縱  
遂薦王公撫滇以制之凡九月疏二十上而卒爲所齟以去  
其始至滇日卽榜其堂云不攜童僕單身自來意在潔已奉  
公豈肯縱人壞事嗚呼此真古大臣之言哉彼宦途之以聲

勢相高者輿臺儼從動輒百人少亦不下數十州縣且然等而上之遂至莫可究極皆端毅之罪人也

公名人故錄全傳少節其無甚緊要者餘皆仿此至若中丞之有錢塘鄭融侍御之有華亭包節豫章鄧漢藩臬之有鄱陽章軒四明張時徹白門劉麟長洲皇甫縉雲何鏗華亭馮時可皆以文章名世而政事勳業爛然不能相掩知府則大理賈銓邯鄲人楚雄邵敏長沙人姚安馬自然內江人則其尤著者若李贄雖有文名而其末也逃入緇黃橫議殺身君子無取焉

節剛明史雲南副總兵劉綎傳

劉綎都督顯子勇敢有父風用廕為指揮使萬曆初從顯討九絲蠻先登勇冠諸軍遷雲南迤東守備改南京小教場坐營十年冬緬甸犯永昌騰越巡撫劉世曾請濟師明年春擢綎游擊將軍署騰衝守備事緬甸去雲南遠自其酋莽瑞體以兵服諸土司勢遂強數擾邊境江西人岳鳳者商隴川驍策多智為宣撫多士宵記室士宵妻以妹鳳媚士宵而奪之權與三宣六慰諸酋插血謀叛誘士宵往見瑞體潛與子曩烏醜殺之并殺其妻子奪金牌印符受瑞體偽命代士宵為宣撫瑞體死子應裏



嗣鳳父子誘敗官軍獻土甯母胡氏及族黨六百餘人於應裏  
盡殺之初與木邦酋罕拔同謀後譖之死結耿馬賊罕虔南甸  
土舍刀落參芒市土舍放正堂爲逆應裏乃令從父猛別與鳳  
虔落參正堂等各率象兵數十萬分道內侵攻雷弄蓋達干崖  
南甸木邦老姚思甸諸處殺掠無算窺騰越永昌大理蒙化景  
東鎮沅元江已陷順甯破蓋達又令曩烏引緬兵突猛淋指揮  
吳繼勳等戰死鄧川土知州何鈺鳳僚壻也使使招之鳳繫獻  
應裏當是時車里八百孟養木邦孟良猛密蠻莫皆以兵助賊  
賊勢益甚黔國公沐昌祚聞警移駐洱海巡撫世曾亦移楚雄

大徵漢土軍數萬令參政趙睿壁蒙化副使胡心得壁騰衝陸  
通霄壁趙州僉事楊際熙壁永昌與監軍副使傅寵姜忻督參  
將胡大賓等分道進擊連戰於蓋達隴川南甸猛淋戛陽夾象  
石大小十餘次積首千六百有奇猛別落參授首參將鄧子龍  
擊斬罕虔於姚關賊奪氣應裏趨鳳東寇姚關北據灣甸芒市  
鈺復開示百方與之盟誓會緹亦至軍聲益振鳳懼乃令妻  
子及部曲來降緹責令獻金牌印符及蠻莫猛密地乃以送鳳  
妻子還隴川爲名分兵趨沙木籠山據其險而已馳入隴川境  
鳳度四面皆兵遂詣軍門降緹復兵進緬緬將先遁留少兵隴

川縉攻之鳳子曩烏亦降縉乃攜鳳父子往攻蠻莫蠻莫賊知  
鳳降馳報應裏將發兵再圖隴川縉乘勝掩殺賊賊窘乞降縛  
緬人及象馬來獻蠻莫平遂招撫孟養賊賊將乘象走追獲之  
復移師圍猛臉生擒其魁雲南平獻俘於朝帝爲告謝郊廟受  
百官賀內閣申時行以下悉進官廕子縉亦進副總兵予世廕  
鈺賜白金二千乃改孟密安撫司爲宜撫增設安撫二曰蠻莫  
曰耿馬長官司二曰猛臉曰猛養千戶所二一居姚關一居孟  
淋皆名之曰鎮安命縉以副總兵署臨元參將移鎮蠻莫初鳳  
降本以計誘而巡撫世曾稱陣擒遂行獻俘禮敘功濫及閣部

未幾緬人復大舉寇猛密兵戰敗賊遂圍五章把總高國  
春率五百人援破賊數萬連摧六營爲西南戰功第一進官世  
廕副千戶縉亦優敘蠻莫設安撫以土官思順有功特授之縉  
納其重賄又縱部將謝世祿等淫其妻妹思順大怨縉將家子  
父顯故部曲多健兒縉擁以自雄征緬之役勒兵金沙江築將  
臺於王驥故陟威名甚盛然性貪御下無法兵還至騰衝皆甲  
而譟焚民居縉在蠻莫聞之馳至出財犒之始定還至蠻莫思  
順恐禍及叛歸莽酋詔革縉任以游擊候調無何羅雄變起羅  
雄者曲靖屬州也者氏世爲知州嘉靖時者濬嗣職殺營長而

奪其妻生子繼榮年十四持刀逐濬濬欲刀之以其母故錮之別室後年老無他子乃釋令襲職繼榮得州卽逐濬濬訴之上官上官俾繼榮迎濬歸卽囚之如曩日囚已狀并囚其嫡母隆氏而遍烝父妾有沙氏不從自縊死濬復遣使訴上官繼榮殺之中途會征緬徵繼榮兵將行慮濬爲後患遂弑之時霑益土知州安世鼎卒妻安素儀典州事亦赴調繼榮見素儀大悅遂與合營而淫之聞越州土舍海現寡嫂資氏美強與通知州越應奎怒謀殺之繼榮脫走妖僧王道張道以繼榮有異相必奇貴奉爲主用符術鍊丁甲煽聚徒黨獨外弟隆有義不從繼

榮乃築寨赤龍山山廣六十里建龍樓鳳閣環以堅城下有龍潭九盡質部將妻子於其中曉夜爲淫樂十三年冬分黨四剽廣西師宗陸涼諸府州咸被患巡撫世曾檄調漢土軍屬監司程正誼鄭璧等分禦之會緹解官至霑益世曾喜令與裨將劉紹桂萬整分道討緹直搗赤龍山拔之獲其妻妾數人繼榮逸去緹連克三砦斬王道張道追囚至阿拜江隆有義部卒斬繼榮首以獻賊盡平時首功止五十餘級而撫降者萬餘人論者稱其不妄殺賊平世曾請築城改設流官分曲靖衛軍戍之乃以何倓知州事土舍者繼仁爲巡檢未幾土酋必大復反殺繼

仁執倭參將蔡兆吉等誅定之乃改羅雄曰羅平設千戶所曰定雄制度視中土部內遂甯初縉破繼榮有論其私財物者功不錄世曾爲辨誣乃賜白金尋用爲廣西參將移四川二十年召授五軍三營參將會朝鮮用師縉請率川兵五千赴援詔以副總兵從征至則倭已棄王京遁縉趨尚州烏嶺嶺亘七十里峭壁通一線倭拒險別將查大受祖承訓等間道踰槐山出烏嶺後倭大驚遂移駐釜山浦縉及承訓等進屯大邱忠州別以水兵布釜山海口朝鮮略定未幾倭遣小西飛納款隨犯咸安晉州逼全羅提督李如松急遣李平胡查大受屯南原祖承訓

李甯屯咸陽縉屯陝川扼之倭果分犯諸將並有斬獲倭乃從釜山移西生浦送王子歸朝鮮帝命撤如松大軍還止留縉及游擊吳惟忠合七千六百人分扼要口總督顧養謙力主盡撤縉惟忠亦先後還屬播酋楊應龍作亂擢縉四川總兵官縉戍朝鮮二年勞甚覲勦功優敘乃賄御史宋興祖興祖以聞法當褫部議縉功多請盡革雲南所加功級以副總兵鎮四川尋以應龍輸款而青海寇數擾邊特設臨洮總兵官移縉任之二十四年三月火落赤真相昆都魯歹成他卜囊等掠番窺內地縉部將周國柱等擊之莽刺川腦斬首百三十有奇獲馬牛雜畜

一萬計帝爲告郊廟宣捷縉等進秩予廕有差明年五月朝鮮  
再用師詔縉充禦倭總兵官提督漢土兵赴討又明年二月抵  
朝鮮則楊鎬李如梅已敗經略邢玠乃分軍三中董一元東廠  
貴西則縉而陳璘專將水兵縉營永源倭亦分三路西行長據  
順天濠砦深固縉欲誘執之遣使請與期會使者三反縉皆軍  
騎俟道中行長覘知之乃信期以八月朔定約至期縉部卒洩  
其謀行長大驚逸去縉進攻失利監軍參政王士琦怒縛其中  
軍縉懼力戰破之賊退不敢出諸將三道進縉挑戰勝之驅賊  
入大城已賊聞平秀吉死將遁縉夜半攻奪栗林曳橋斬獲多

石曼子引舟師救陳璘邀擊之海中行長遂棄順天乘小艘遁  
班師進縉都督同知世廕千戶遂移師征楊應龍會四川總兵  
官萬鏊罷卽以縉代之時兵分八道川居其四川東又分爲二  
以綦江道最要令縉當之應龍熟縉才頗懼益兵守要害二十  
八年正月諸將克丁山銅鼓嚴村遂直搗南木山羊簡臺三峒  
峒絕險賊將穆照等衆數萬連營諸將憚之縉分兵攻其三面  
大戰於李漢壩生擒其魁餘賊奔入峒乘勢克三關直搗峒前  
焚之賊多死盡克三峒擒穆照及賊魁吳尚華是日縉督戰左  
持金右挺劍大呼曰用命者賞不用命者齒劍鬪死者四十八

遂大捷應龍乃遣子朝棟惟棟及其黨楊珠統銳卒數萬由松坎魚渡羅古池三道並進縱伏萬人羅古待松坎賊以萬人伏營外待魚渡賊而別以一軍策應賊果至伏盡起縱率部下轉戰斬首數百追奔五十里賊聚守石虎關縱亦掘塹守初縱聞征播命逗遛多設難要朝廷言官交劾議調南京右府僉書縱至是聞之卽辭任總督李化龍以平播非縱不可固留之力薦於朝縱乃復受事踰夜郎舊城攻克賊滴淚三坡瓦窰坪石虎諸隘直抵婁山關婁山萬峯插天叢箐中一徑纔數尺賊設木關十三座排柵置深坑百險俱備縱分奇兵爲左右路間道趨

關後而自督大軍仰攻奪其關追至永安莊兩路軍亦會縱老將持重慮賊衝突聯諸營一據婁山關爲老營一據白石口爲腰營一據永安莊爲前營都指揮王芬者勇而寡謀每戰輒請爲前鋒連勝有輕敵心獨營松門埡之衝距大營數里賊方有烏江之勝謀再奪婁山適穆照遣使洩芬孤軍狀賊乃襲殺芬守備陳大綱天全招討楊愈亦死失士卒二千人縱聞急往救部將周以德周敦吉夾攻賊始大奔追至養馬城而還是日應龍幾被獲乃不敢窺婁山縱懲前失劄近關堅壁且請濟師踰十餘日克後水圍營於冠子山尋會馬孔英吳廣諸軍逼海

龍固下與諸將共平賊。綖功爲多。初李化龍薦綖言官謂綖嘗納應龍賄宜奪官。從軍部議戴罪辦賊。綖德化龍使使齎玉帶一黃金百白金千投化龍家爲化龍父所叱投巡按御史崔景榮家亦如之。化龍景榮並奏其事。詔革綖任永不錄沒其物於官。監生吳中彥者挾綖及貴州總兵李遇文重貲爲求官事。覺論死。綖再緝已錄平播功進左都督。世廕指揮使。三十六年雲南阿克反起。綖討賊總兵官賊平寢前命四十年四川建昌猓亂命綖爲總兵官討之。偕參政王之機分八道督諸將攻而已。居中節制克桐槽沈渣阿都厦卜越北諸砦大小五十六戰斬

馘三千三百有奇。諸猓巢穴一空。綖爲將數被黜抑性驕恣如故嘗拳毆馬湖知府詹淑淑改調。綖奪祿半年久之以軍政拾遺罷歸。四十六年帝念遼警召爲左府僉書。明年二月經略楊鎬令綖及杜松李如柏馬林四路出師。綖兵四萬由寬奠副使康應乾監之游擊喬一琦別監朝鮮軍並進。綖鎮蜀久好用蜀兵久待未至遂行而所分道獨險遠重岡疊嶺馬不得成列次。深河連克牛毛馬家二砦。

大清兵五百守董鄂路聞綖軍至逆戰。綖縱兵圍數重。

大清兵衆寡不敵失裨將額勒納額黑乙傷五十人餘潰圍出。

江東  
三  
縉已深入三百里杜松軍覆猶不知復整衆進遇

大清兵縉引軍登阿布達里岡將布陣

大清兵亦登岡出其上而別以一軍趨縉西岡上軍自高馳下奮擊縉軍縉殊死戰趨縉西者復從旁夾擊縉軍不能支遂潰大清兵乘勢追擊與縉後二營軍遇後軍未及陳爲

大清兵所乘亦敗縉戰死養子劉招孫者最驍勇見縉死突圍出手格殺數人亦死士卒脫者無幾時應乾及朝鮮軍營富察之野

大清遂移師邀之應乾兵及朝鮮兵列械將戰忽狂風驟起揚

沙石應乾發火器反擊已營大亂

大清兵乘勢衝擊大破之掩殺幾盡風乃息應乾以二百騎免一琦亦爲

大清兵擊破走入朝鮮營

大清兵進逼之朝鮮都元帥姜宏立副元帥全景瑞懼率衆降一琦自縊死楊鎬聞杜松馬林師敗馳召縉及李如柏還騎未至縉已覆獨如柏全事聞帝遣中使祭陣亡將士恤縉家縉於諸將中最驍勇平緬寇平羅雄平朝鮮倭平播酋平猓大小數百戰威名震海內縉死舉朝大悚邊事日難爲矣天啓初贈縉



少保世廕指揮僉事立祠曰表忠

師範曰岳鳳之誅或謂劉世曾以計降為陣擒遂致宣捷受俘迨鳳死而蠻懼遂俱附緬夫鳳乃江右一細民耳蠱多氏而奪其位旋挾莽應裏釀患西南幾無淨土鳳與縉為鄉人安知其非構縉而大有所欲耶予以為誅之誠是也

縉嘗泊望江之華陽鎮先是有劇盜欲劫一富賈以草履識其舟尾賈覺之移履縉舟盜至執械齊入縉手擒四人叱曰汝識劉大刀耶乃敢爾皆叩頭請死願隸麾下縉笑納之後亦得其用縉部曲盖多此類也

節剛明史雲南副總兵鄧子龍傳

鄧子龍豐城人貌魁梧驍捷絕倫兼通翰墨嘉靖中江西賊起掠樟樹鎮子龍應有司辟破平之累功為廣東把總萬曆初從大帥張元勳討平巨盜賴元爵已從平陳金鶯羅紹清賊魁黃高暉逸子龍入山生獲之遷銅鼓石守備尋擢署都指揮僉事掌浙江都司被論當奪職帝以子龍犯輕會麻陽苗金道侶等作亂擢參將討之大破賊解散其黨五開衛卒胡若盧等火監司行署三捷逐守備再捷逐黎平守靖州銅鼓龍里諸苗咸響應為亂子龍火其東門以致賊而潛兵入北門賊遂滅十一年

閏二月緬甸犯雲南詔移子龍永昌木邦部耿馬有奸人罕虔與岳鳳同爲逆說莽應裏內侵應裏卽用虔爲木邦宣慰使虔從緬兵掠干崖南甸已引渡查理江直犯姚關灣甸土知州景宗真及弟宗材助之子龍急戰攀枝樹下陣斬宗真虔生獲宗材虔子招罕招色奔三尖山自謂得天險令叔罕老率蒲人藥弩手五百阻要害子龍利誘蒲人盡知賊間道乃命裨將鄧勇等提北勝浪渠諸番兵直搗賊巢夜半上而預伏兵山後夾擊火器競發生擒招罕招色罕老及其黨百三十餘人斬首五百餘級尖山巢空乃撫流移數千人會劉綎亦俘岳鳳以獻帝悅

進子龍副總兵予世廕無何緬人復寇猛密把總高國春大破之子龍以犄角功亦優敘自是蠻人先附緬者多來附邊徼獲甯永昌騰衝夙號樂土自岳罕倡亂始議募兵所募多亾命乃立騰衝姚安兩營劉綎將騰軍子龍將姚軍不相能致軍鬪帝以兩將皆有功置不問旣而綎罷劉天俸代天俸被逮遂以子龍兼統之子龍右姚兵每工作輒虐騰兵及用師隴川子龍故低昂兩營兵騰兵大不堪欲去副使姜忻令他將轄之乃定而姚兵久驕因索餉作亂由永昌大理抵會城所過剽掠諸兵夾擊之俘四百餘人亂始靖子龍坐禡官下吏十八年孟養賊思

箇叛箇初爲緬追勢窮來歸會初設孟養長官司卽以箇爲長官至是叛投緬引緬兵寇孟養破孟拱其冬又破孟廣子龍方對簿巡撫吳定請令立功自贖帝許之命未至定已與黔國公沐昌祚遣將却之無何丁改十寨賊普應春霸生等作亂勢張甚定大徵漢土軍令子龍軍其右游擊楊威軍其左大破之斬首一千二百級招降六千六百人帝爲告謝郊廟宣捷受賀復子龍副總兵署金山參將事先是猛廣土官思仁烝其嫂甘線姑欲得之弗克偕其黨丙測叛歸緬數導入寇二十年攻孟養犯蠻莫土同知思紀奔等練山子龍擊敗之乃去子龍尋被劾

罷歸二十七年朝鮮用師詔以故官領水軍從陳璘東征倭將渡海遁璘遣子龍偕朝鮮統制使李舜臣督水軍千人駕三巨艦爲前鋒邀之釜山南海子龍素慷慨年踰七十意氣彌厲欲得首功急攜壯士二百人躍上朝鮮舟直前奮擊賊死傷無算忽他舟擲火器誤入子龍舟舟中火發賊乘勢擊子龍戰死舜臣赴救亦死事聞贈都督僉事世廕一子廟祀朝鮮

師範曰練兵難撫兵更難撫兵固難輯兵爲更難嚴步伐申號令此練之之說也恤傷瘼均勞逸此撫之之說也至輯則非且夕間所能求效蓋寓兵之法已盡廢府兵之制不可行

勢不得不出於招募所謂招募者非四遠之逋逃卽憑城之  
奸猾耳鋒刃旣接金鼓相逼戰勝攻取惟思借其死力必廣  
示以欣艷之端復曲縱其剽悍之性而後其強可恃其勇不  
撓勇遂近鬻強遂近暴少有挫辱往往激而成變劉鄧兩將  
軍功垂滇塞俱以兵噪大減威名而武橋爲甚今夫太阿之  
利龍雀之鈺果持其柄而用之水斷蛟龍陸剽兕象旋卽納  
之于室以藏其鋒斂其銳否則傷手之虞常出諸意外生駒  
日馳數百里超塵越影要在謹其銜勒時其水草潔其槽櫪  
一有不慎每多罣駕兵亦猶是也安得起節制之師而與之

言輯乎雖然世之治兵者辱而不知振貧而不知憫驕而不  
知禁私署之使令急於射圃之差操月支之糧銀半歸貪弁  
之扣剋乃復三五結黨狼狽相依揚揚然誇于人曰我兵也  
平民莫敢侮有司不得問藏匿窩盜百惡俱備倘遇小警非  
走卽降是又劉鄧之罪人矣嗚呼兵豈易談哉

武橋攀枝花之戰所關甚大馬樞部

繼

以詩慰留云萬里提

兵入不毛溪橫毒水瘴烟高風霆一鼓空蠻壘雲雨千山鏹  
賊塚冢口任教讒意苒南人只解頌功勞邊疆近說還多事  
誰許將軍脫戰袍又作姚關行美之前以兵事來者楚則莊

躡漢則郭昌衛廣劉佷蜀則趙雲魏延關興隋則史萬歲唐  
 則梁建方唐九徵宋則楊文廣元則阿朮也罕的斤明則陳  
 桓費聚胡海王驥奉使者漢元封元年司馬遷以郎中南畧  
 筮管昆明報命元封二年司馬相如以中郎將持節開越雋與  
 副使王然于壺充國呂越人馳四乘之傳畧定西南夷唐則  
 崔佐時袁滋徐雲虔宋則辛怡顯元則王律朮王候王鑑均為梁段  
氏所明則王禕吳雲均為梁王所害國朝則哲勒肯以移藩任蘭  
 枝以定安南界舒相國德赫以巡閱劉相國統勳姜大司寇晟俱  
 以審案而哈提軍國輟武橋差堪彷彿云

三國志蜀漢建甯太守李恢傳

李恢字德昂建甯俞元人也任郡督郵姑夫爨習為建伶令有  
 違犯之事恢坐習免官太守董和以習方士大姓寢而不許華陽

國志曰習後後貢恢於州涉道未至聞先主自葭萌還攻劉璋

恢知璋之必敗先主必成乃託名郡使北詣先主遇於縣竹先  
 主嘉之從至雒城遣恢至漢中交好馬超超遂從命成都既定  
 先主領益州牧以恢為功曹書佐主簿後為亡虜所誣引恢謀  
 反有司執送先主明其不然更遷恢為別駕從事章武元年康  
 降都督鄧方卒先主問恢誰可代者恢對曰人之才能各有長

短故孔子曰其使人也器之且夫明主在上則臣下盡情是以先零之役趙充國曰莫若老臣臣竊不自揆惟陛下察之先主笑曰孤之本意亦已在卿矣遂以恢為庾降都督使持節領交州刺史住平夷縣臣松之訊之蜀人云庾降地名去蜀二千餘里時未有甯州號為南中立此職以總攝之分為甯州晉秦始中始先主薨高定恣睢于越雋雍闓跋扈于建甯朱褒反叛于犍牂丞相亮南征先由越雋而恢案道向建甯諸縣大相糾合圍恢軍于昆明時恢眾少敵倍又未得亮聲息紹謂南人曰官軍糧盡欲規退還吾中間久斥鄉里乃今得旋不能復北欲還與汝等同計謀故以誠相告南人信之故圍守怠緩於

是恢出擊大破之追犇逐北南至槃江東接犍牂與亮聲勢相連南土平定恢軍功居多封漢興亭侯加安漢將軍後軍還南夷復叛殺害守將恢身往撲討鋌盡惡類徙其豪帥于成都賦出叟濮耕牛戰馬金銀犀革充繼軍資于時費用不乏建興七年以交州屬吳解恢刺史更領建甯太守以還居本郡徙居漢中九年卒子遺嗣恢弟子球羽林右都督帥諸葛瞻拒鄧艾臨陣授命死於縣竹

師範曰滇非無人以紀載失傳遂若無人耳李德昂豈愧西州豪傑哉蒙氏張建成于開元十年入朝明皇厚禮之其過

成都太慈寺鐘初成僧曰擊一聲施黃金一兩建成連扣八十僧驚問之曰吾南使張建成也僧遂易其名曰化成而並吞五詔皆建成之謀焉清平官張羅定開元十七年與張審素大破蠻軍拔昆明及鹽城唐封為永昌郡都督南詔稱為大監軍卒後土人立碑謂其義勇有度量至王毗雙羅時王樂寬段儉魏段克附洪光乘杜羅盛楊佑皆于閣羅鳳時著有功績趙羅眉楊傳盛驃旁苴與牟尋使之三路通唐其餘則尹輔酋授御史中丞楊鎮龍授試太僕卿鄧傳傍授殿中監郎孟獲孟玟亦同德昂輔蜀故備紀之若鄭回杜光庭又當別論

三國志蜀漢永昌太守呂凱傳

呂凱字季平永昌不韋人也

孫盛蜀世譜曰初秦徙呂不韋子弟宗族于蜀漢漢武帝時開西南

夷置郡縣徙呂氏以充之因曰不韋縣

任郡五官掾功曹時雍闓等聞先主薨于

永安驕黠滋甚都護李嚴與闓書六紙解喻利害闓但答一紙曰蓋聞天無二日土無二王今天下鼎立正朔有三是以遠人惶惑不知所歸也其桀慢如此闓又降于吳吳遙署闓為永昌太守永昌既在益州郡之西道路壅塞與蜀隔絕而郡太守改易凱與府丞蜀郡王伉帥厲吏民閉境拒闓闓數移檄永昌稱說云云凱答檄曰天降喪亂姦雄乘釁天下切齒萬國悲悼臣

妾大小莫不思竭筋力肝腦塗地以除國難伏惟將軍世受漢  
恩以爲當躬聚黨衆率先啟行上以報國家下不負先人書功  
竹帛遺名千載何期臣僕吳越背本就末乎昔舜勤民事崩于  
蒼梧書籍嘉之流聲無窮崩于江浦何足可悲文武受命成王  
乃平先帝龍興海內望風宰臣聰睿自天降康而將軍不覩盛  
衰之紀成敗之符譬如野火在原蹈履河冰火滅冰泮將何所  
依附曩者將軍先君雍侯造怨而封竇融知興歸志世祖皆流  
名後葉世歌其美今諸葛丞相英才挺出深覩未萌受遺託孤  
翊贊季葉與衆無忌錄功志瑕將軍若能翻然改圖易跡更步

古人不難追鄙士何足宰哉蓋聞楚國不恭齊桓是責夫差僭  
號晉人不長况臣于非主誰肯歸之邪竊惟古義臣無越境之  
交是以前後有來無往重承告示發憤忘食故略陳所懷惟將  
軍察焉凱威恩內著爲郡中所信故能全其節及丞相亮南征  
討闔既發在道而闔已爲高定部曲所殺亮至南上表曰永昌  
郡吏呂凱府丞王伉等執忠絕域十有餘年雍闓高定偏其東  
北而凱等守義不與交通臣不意永昌風俗敦直乃爾以凱爲  
雲南太守封陽遷亭侯會爲叛夷所害子祥嗣而王伉亦封亭  
侯爲永昌太守

蜀世譜曰呂祥後爲晉南夷校尉祥子及孫世  
爲永昌太守李雄破南州諸呂不肯附舉郡固



滇東

守王伉等  
亦守正節

師範曰漢明帝于武帝所立不韋縣設永昌郡後皆因之郎  
蒙段竊據亦置永昌節度使元至元十七年破阿瓦拔江頭  
置邦牙宣慰司于蒲甘復命雲南王移緬怯烈從之先于十  
六年張立道請以雲南王子也先帖木兒襲王時也先征緬  
未歸詔忙古帶往迎金齒白衣荅奔諸蠻設險為梗凡十餘  
戰開金齒道奉王以還是金齒衛特邦牙之末屬耳後改皇  
孫仍鎮雲南緬地復陷以金齒衛寄治永昌而府仍如故明  
胡淵裁府于衛以圖自安寧百餘年始裁衛復府而金齒之

稱竟繫之永昌夫以漢唐之古郡而冒蠻夷之陋名生此者  
明知其非亦習焉而若忘也况據樊綽名類志云金齒銀齒  
等蠻並在永昌關南金齒蠻以金鑲片裹其齒見人以此為  
飾食則去之悉隸安西城又據其城鎮志云越禮城在永昌  
北臨祿禪江水郎黑南至摩步樂城西南有羅君尋城又西至  
利城渡水郎陽川直南過山至押西城又南至首外川又西  
至蠻部落又西至鹽井又西至拔熱河麗水城尋傳大川城  
在水東從上郎坪北里眉羅鹽井至安西城直北至小婆羅  
門國迄今地名雖易而永昌金齒燦然可指相去幾及三千



